



Polisi y'u Rwanda

UMUTEKANO



N° 34 NZERI 2016



AGM AND CYBER CRIME TABLETOP EXERCISE

28th August - 2nd September 2016



**Ntitugomba guha icyuho
abanyabyaha:
Perezida Kagame**



TELEFONE ZA POLISI WAHAMAGARAHO USHAKA UBATABAZI CYANGWA GUTANGA AMAKURU

Mu rwego rwo gukomeza kunoza imikoranire yayo n'Abaturage hagamijwe kubumbatira umutekano w'abantu n'ibyo batunze, Polisi y'u Rwanda yongeye kwibutsa Abaturarwanda imirongo ya terefoni itishyura ndetse n'indi ikoreshwa n'inzego zayo mu Gihugu cyose bahamagaraho, baba batanga amakuru, basobanuza cyangwa bifuza gutabarwa bashobora kohereza ubutumwa bwabo bwanditse aha hakurikira:

IMITWE YA POLISI IKORA IMIRIMO YIHARIYE (SPECIALIZED SERVICES)

Ubutabazi rusange:	112	Ihohoterwa rishingiye ku gitsina:	3512
Inkongi y'umuriro:	111	Isange One Stop Centre:	3029
Impanuka zo mu muhanda:	113	Ibibazo bifitanye isano na ruswa:	997
Ibibazo byavuka mu biyaga n'imigezi :	110	Ihirego biregwa umupolisi:	3511
Uburenganzira bw'umwana:	116		

Imikoranire n'inzego zitandukanye (Public Relations):	0788311550 0788311155
Umutekano wo mu muhanda:	0788311110
Ubugenzacyaha:	0788311209
Ibirorwa bya Polisi (Operations):	0788311201
Polisi Mpuzamahanga (Interpol):	0788311107
Ubufatanye n'izindi nzego (International Cooperation):	0788311133
Umutekano w'ibibuga by'indege:	0788311139

ABAYOBOZI BA POLISI MU NTARA N'UMUJYI WA KIGALI

Amajyaruguru:	0788311151
Uburengerazuba:	0788311118
Uburasirazuba:	0788311142
Amajyepfo:	0788311138
Umujyi wa Kigali:	0788311128

ABAUGIZI BA POLISI

Uburengerazuba:	0788311696
Uburasirazuba:	0788311774
Umujyi wa Kigali:	0788311829
Amajyaruguru:	0788311828
Amajyepfo:	0788311818
Umutekano wo mu muhanda:	0788311502

**USHAKA KUNYUZA
UBUTUMWA MU
NYANDIKO**

Agasanduku k'iposita
(P.O.Box): **6304** Kigali

Website: www.police.gov.rw

E-mail: info@police.gov.rw

Twitter: [@Rwandapolice](https://twitter.com/Rwandapolice)

ISHAKIRO

5

Ntitugomba guha icyaho abanyabyaha: Perezida Kagame

22

Intara y'Iburasirazuba: Abaturage basabwe gufatanya kurwanya ubujura bw'amatungo

7

IGP Gasana yasabye Sosiyete zitwara abagenzi gukora kinyamwuga

23

Bane bafungiwe kugerageza guha ruswa abashinzwe umutekano

8

Abaminisitiri n'Abayobozi ba Polisi bo muri aka karere bihereye ijisho imyitozo ku kurwanya ibyaha byifashisha ikoranabuhanga

24

Gatsibo: Abayobozi b'imisigit y'abayasilamu barasabwa ubufatanye mu gukumira ibyaha

14

Musanze: 300 bahawe ubumenyi bwo kuzimya bwo ku nkongi z'imiriro

27

Polisi y'u Rwanda yaburijemo icuruzwa ry'abantu batatu, inafata ucyekwaho gukora iki cyaha

21

GICUMBI: Umusore ucyekwaho kwica nyina yarafashwe

30

Police FC yasinyishije Mico wakiniraga AS Kigali

Abagize uwanditsi bw' ikinyamakuru

Ubuyobozi Bukuru
Polisi y'u Rwanda

Inama y'Uwanditsi
ACP Damas Gatare
ACP Theos Badege
ACP Celestin Twahirwa

Umwanditsi mukuru
ACP Celestin Twahirwa

Umunyamabanga w'Ubwanditsi
IP JMV Nzayisenga

Abanyamakuru
IP Francois Mugabo
IP JMV Nzayisenga
Kamana Laurent

Photographer
AIP Jackson Umunezero
CPL Tunezerwe Aimable
PC Ndahtiro Rigobert
PC Nzirorera JMV

Graphic Designer
Babirye Joy

Copyright 2016
Polisi y'u Rwanda

Ijambo ry'ibazze

Gutanga amakuru vuba ni ngombwa mu guca burundu ubujura bukorwa n'abiyitirira imirimbo badakora

Hirya no hino mu gihugu hagenda hagaragara abantu bamwe na bamwe batunzwe no kunyunuza imitsi y'abaturage barya amafaranga yabo n'ibindi babizeza ibitangaza runaka, kubabonera akazi, kubafasha kubona serivisi iyi n'iyi n'ibindi. Aba batekamutwe ariko byamaze kugaragara ko nta mwanya bafite mu muryango nyarwanda kuko ubufatanye no guhanahana amakuru hagati y'abaturage n'izindi nzego bituma batgera kumugambi wabo. Ni nako byagenze ubwo Polisi y'u Rwanda yafataga umutekamutwe wari umaze igihe arya amafaranga y'abaturage yiyita umupolisi wo mu ishami rya Polisi y'u Rwanda rishinzwe umutekano wo mu muhanda, akaba yarababeshyaga ko yabafasha kwandikisha impushya zo gutwara ibinyabiziga mu gihe bamuhaye amafaranga runaka.

Uwafashwe yitwa Mpaka Eric. Yafashwe tariki ya 27 Kanama 2016 nyuma y'uko hari bamwe mu baturage batanzie ibirego byabo kuri Polisi ikorera mu Mujyi wa Kigali, ko batwawe amafaranga muri ubu buryo.

Umuvugizi w'ishami rya Polisi y'u Rwanda rishinzwe umutekano wo mu muhanda Chief Inspector of Police (CIP) Emmanuel Kabanda yagize ati: " Mpaka yiyitaga umupolisi ukorera mu ishami rya Polisi y'u Rwanda rishinzwe umutekano wo mu muhanda, noneho akajya ahamagara abantu ababwira ko Polisi yagabanyije amafaranga ku bantu batsindiyi impushya za burundi zo gutwara ibinyabiziga bifusa kuzandikisha bifashishije uburyo busigaye bukoreshwa bwitwa Irembo".

Uyu mutekamutwe witwa Mpaka yabeshyaga abantu, aho yababwiraga ko kuba afite ibyo akora muri polisi, byatumwa abafasha kubona impushya zo gutwara ibinyabiziga ku buryo bworoshye.

CIP Kabanda yakomeje avuga ko Mpaka Eric yatse abantu batatu amafaranga y'u Rwanda ibihumbi 35 buri wese, kugira ngo abafashe kwandikisha impushya zabo za burundi zo gutwara ibinyabiziga babinyujije kuri serivisi z'Irembo. Aba bantu yatekeye umutwe bari bariganye mu mashuri, ku buryo bari baziranye, bityo bikaba byaramworheraga kubumvisha ko hari ibyo yabafasha. Ubwo bamaraga kuyamuha yabahaga imibare (codes) itari iy'ukuri, hanyuma mu gihe barimo gusaba serivisi zo kwandikisha impushya zabo basindiyi babinyujije mu buryo bw'Irembo bagasanga bidashoboka.

Nyuma yo kuvumbura ko amafaranga yabo yariwe, bahise biyambaza Polisi y'u Rwanda mu Mujyi wa Kigali, maze nayo bidatinze ifata uriya mutekamutwe, ubu akaba afungiwe kuri Sitasiyo ya Polisi ya Kimihurura, mu gihe iperereza rigikomeje kugira ngo hamenyekane niba hari abandi barive amafaranga yabo kuri ubu buryo.

CIP Kabanda yagize ati: " Polisi y'u Rwanda ntikoresha abatekamutwe cyangwa se ibisambo nk'uyu wafashwe cyangwa abandi. Serivisi yose umuntu akeneye arayihabwa kandi akayibona ku giti cye nta kunyura ku muntu runaka, kandi n'amafaranga yo kwandikisha uruhushya rwa burundi rwo gutwara ikinyabiziga ntiyigeze ahinduka ngo ave ku bihumbi 50 by'amafaranga y'u Rwanda".

Yasabye abaturage gukomeza kujya batanga amakuru igihe cyose babonye umuntu witegura gukora ibyaha bitandukanye kugira ngo habeho kuburizamo no gufata abo banyabyaha banyuranye.

Abatekamutwe nk'uyu iyo bafashwe, ibihano bahabwa bikubiye mu ngingo ya 318 yo mu gitabo cy'amategeko ahana ibyaha cyu Rwanda, aho igira iti: " Umuntu wese, abigiriye kwambura ikintu icyo ari cyo cyose cy'undi, agatuma bakimuha ari uko akoresheje amayeri y'ubwambuzi, wiyitirira amazina atari yo cyangwa imirimbo adafitiye ububasha cyangwa agira ngo yizeze icyiza cyangwa atinyishe ko hari ikizaba kibi maze akambura undi imari ye yose cyangwa igice cyayo, ahanishwa igifungo kuva ku myaka itatu (3) kugeza ku myaka itanu (5) n'ihazabu y'amafaranga y'u Rwanda kuva kuri miliyoni eshatu (3.000.000) kugeza kuri miliyoni eshanu (5.000.000)".

Ntitugomba guha icyuho abanyabyaha: Perezida Kagame

Perezida Paul Kagame yasabye Abakuru ba Polisi z'ibihugu byo muri Afurika y'Iburasirazuba (EAPCCO), kunoza imikoranire yabo kugira ngo bafatanye gukumira no kurwanya ibyaha ndenga mipaka birimo ibikorwa hifashishjwe ikoranabuhanga.

Ibi Umukuru w'igihugu yabivuze ku wa 31 Nyakanga ubwo yatangizaga ku mugaragaro inama ya 18 y'Abakuru ba Polisi bo muri Afurika y'Iburasirazuba (EAPCCO), n'umwitozo w'iminsi 5 wo kurwanya ibyaha bikorwa hifashishjwe ikoranabuhanga.

Yagize ati: "Ntitugomba guha icyuho abanyabyaha cyangwa ngo ibihugu byacu bibe ubuhungiro bwabo. Icyo dusabwa ni imikoranire, guhanahana amakuru no kwifashisha ikoranabuhanga rigezweho mu mirimo ya buri munsi ya Polisi."

Umukuru w'igihugu yanabakanguriye kugirirana icyizere kugira ngo iyo mikoranire igamije gufatanya kurwanya no gukumira ibyaha igere ku ntego.

Kuri iyi ngingo, Perezida Kagame yagize ati: "Nta kintu gishobora gusimbura icyizere n'ubuwumvikane mu bayobozi ba za Polisi. Ni yo mpamvu Polisi y'u Rwanda yashiyize imbere imikoranire myiza n'ubutwererane hagati y'inzezo zishinzwe kubahiriza amategeko. Tugomba gukorera hamwe kugira ngo twongererere imbaraga imiryango duhiriramo mu karere ndetse n'indi."

abantu barenga 200 baturutse mu bihugu 37 bya Afurika bitabiriye iyo Nama, barimo Abayobozi Bakuru ba Polisi z'ibihugu byo muri Afurika y'Iburasirazuba (EAPCCO), abayobozi b'amashami ashinzwe ubugenzacyaha (CID) muri ibyo bihugu, abayobozi b'iibiro bya Polisi mpuzamahanga (Interpol), n'abandi batoranyijwe n'ibihugu byabo ngo bitabire uwo mwitoto.

Iyo Nama ya 18 y'Abayobozi Bakuru ba Polisi z'ibihugu byo muri Afurika y'Iburasirazuba yamaze iminsi itatu, ikaba yari ifite insanganyamatsiko igira iti: "Twongere ubufatanye kandi tunoze imikoranire mu kurwanya ibyaha byifashisha ikoranabuhanga."

Perezida Kagame yashimye abagize uyu



Muryango (EAPCCO) kubera imikoranire myiza irangwa ibihugu biwugize.

Yongeyeho ko Polisi ya buri gihugu igomba gukora ibishoboka byose kugira ngo igirirwe icyizere n'abaturage, kumenya ibibanogeye, kandi igakurikiza indangagaciro ku rwego rwo hejuru.

Umukuru w'igihugu yagize kandi ati: "Afurika iri kwihuta cyane mu ikoranabuhanga. Ni yo mpamvu ifite ibago byo kwibasirwa n'ibyaha, ariko ntidushobora kwihanganira ko hari icyatambamira iterambere ryayo kinyuze mu ikoranabuhanga, ahubwo rikwiye gukomeza kuyifasha gutera imbere. Bisaba imikoranire ya hafi y'inzezo z'umutekano kugira ngo gutahura ibyaha nk'ibi, gufata no kugeza mu butabera ababikekwaho byorohe."

EAPCCO yashinzwe mu 1988 i Kampala muri Uganda mu Nama ya mbere yahuje Abayobozi ba za Polisi z'ibihugu byo mu burasirazuba bwa Afurika, ikaba igizwe n'ibihugu 13 ari byo: U Rwanda, Uganda, Burundi, Comoros, Ethiopia, Eritrea, Djibouti, Kenya, Sudan, South Sudan,

Seychelles, Somalia, na Tanzania.

Perezida Kagame yashimye Abayobozi ba Polisi Mpuzamahanga (Interpol) bari muri iyo nama barimo Umunyamabanga Mukuru wayo, Dr Jürgen Stock.

Mu Rwanda habereye kandi umwitozo wo kurwanya ibyaha bikorwa hifashishjwe ikoranabuhanga. Wateguwe na Polisi y'u Rwanda ifatanyije na Polisi Mpuzamahanga (Interpol), ukuba waritabiriwe n'abarenga 100 baturutse mu bihugu bya Afurika.

Uwo mwitoto wari ugamije kongerera inzezo zishinzwe kubahiriza amategeko ubumenyi mu gukumira no kurwanya ibyaha ndenga mipaka birimo ibyifashisha ikoranabuhanga.

Na none ku cyicaro gikuru cya Polisi y'u Rwanda ku Kacyiru.hashyizwe ibuye ry'ifatizo ahazubakwa Ikigo cy'akarere cy'ikitegererezo kizaba gishinzwe kurwanya ibyaha bikorwa hifashishjwe ikoranabuhanga.

Biteganyijwe ko icyo Kigo kizatwara Miliyoni imwe n'igice y'amadolari ya Amerika, kikazaba gifite ibyangombwa byose byifashisha mu kurwanya ibi byaha. Kizajya kandi gitangirwamo amahugurwa yo kurwanya ibyaha bikorwa hifashishjwe ikoranabuhanga.

Dr Stock yavuze ko EAPCCO ari umwe mu miryango irangwa n'imikoranire myiza, kandi asezeranya ko Umuryango abereye Umunyamabanga Mukuru uzakomeza kuyitera inkunga.

"Ntitugomba guha icyuho abanyabyaha cyangwa ngo ibihugu byacu bibe ubuhungiro bwabo. Icyo dusabwa ni imikoranire, guhanahana amakuru no kwifashisha ikoranabuhanga rigezweho mu mirimo ya buri munsi ya Polisi."

Hashyizweho uburyo bushya bwo gukumira impanuka zo mu muhanda

Ishami rya Polisi y'u Rwanda rishinzwe kubungabunga umutekano wo mu muhanda (Traffic Police) ryatangaje ko ryashyizeho uburyo bushya bwo kwifashisha gucunga umutekano wo mu muhanda, aho buzafasha gukumira impanuka zo mu muhanda no guca burundi amakosa agenda agaragara akorwa na bamwe mu batwara ibinyabiziga.

Iri shami ryatangiye gukoresha imodoka zaryo zidafite ibirango bya Polisi birimo nimero zisanzwe ziranga imodoka za Polisi, amabara aranga Polisi y'u Rwanda n'ibindi.

Umuyobozi waryo, Commissioner of Police (CP) George Rumanzi yagize ati:"Izi modoka zatangiye gukorera hirya no hino mu gihugu. Ziba zirimo abapolisi bambaye imyenda isanzwe aho zizenguruka mu mihanda yo mu Mujiyi wa Kigali n'ahandi mu Ntara aho bibaye ngombwa."

Yakomeje agira ati:"Abapolisi bacu bazirimo baba bafite amakarita abaranga ko ari abapolisi. Igihe babonye umuntu utwaye ikinyabiziga ari mu makosa runaka

baramuhagarika bakoresheje amatara ari mu modoka zavuzwe hejuru afite amabara atandukanye."

CP Rumanzi yakomeje avuga ko abapolisi bazajya basaba umushoferi ibyangombwa byose bijyanye no gutwara ibinyabiziga hanyuma basanga ari mu makosa runaka akabihaniwa nk'uko amategeko abiteganya.

Yagize kandi ati:"Bamwe mu batwara ibinyabiziga bakorera ku jisho aho usanga iyo bageze ku mupolisi uri mu muhanda bagenda neza ariko bamara kumucaho bakagendera ku muvuduko ukabije ku buryo hari igihe nko muri kilometero imwe usanga bakoze impanuka."

CP Rumanzi yongeyeho ati:"Abandi na bo usanga bapakira abantu benshi mu modoka (ibyo bita gutendeka) hanyuma bakagenda banyura inzira zitandukanye bakwepa abapolisi kuko baba bazi aho bari cyangwa babonye ibinyabiziga barimo, abandi ugasanga bavugira kuri telefone maze babona umupolisi bakabireka. Hari



n'abandi batwara ibinyabiziga bakagenda babwira bagenzi babo ngo abapolisi bari aha n'aha babatungira agatoki."

Yavuze ko ubu buryo bushya buzafasha mu kurinda umutekano wo mu muhanda hagamijwe gukumira impanuka.Yasabye abakoresha umuhanda bose kubahiriza amategeko yo kuwugendamo no kuwtwarami ibinyabiziga kugira ngo impanuka zikumirwe.

Mu mezi 14 ashize, ni ukuvuga kuva mu kwezi kwa Nyakanga 2015 kugera muri Kanama 2016, habayeho impanuka z'imodoka zitwara abagenzi 245, aho zaguyemo abantu 91 mu gihe abandi 408 bakomeretse ku buryo bukomeye.



Polisi y' u Rwanda yasabye Sosiyete zitwara abagenzi gukora kinyamwuga



Umuyobozi Mukuru wa Polisi y'u Rwanda, IGP Emmanuel K Gasana yibukije abahagarariye amasosiyete atwara abagenzi guhora buri gihe bagenzura imikorere y'imodoka zabo nka bumwe mu buryo bwo gukumira impanuka.

Ibi yabibasabye tariki ya 24 Kanama mu nama yagiranye na bo ku cycaro gikuru cya Polisi y'u Rwanda ku Kacyiru, iyo nama ikaba yaritabiriwe na bamwe mu bofisiye bakuru ba Polisi y'u Rwanda.

IGP Gasana yagize ati:"U Rwanda rurimo gutera imbere cyane ku buryo hari n'umubare munini w'abantu bifusa serivisi zanyu. Na none kandi, twakira abashyitsi bensi baturutse hanze y'igihugu baje mu bikorwa bitandukanye; nkamwe rero mufite amasosiyeti ajyanye no gutwara abo bantu, mugomba kumenya ko ako kazi kagomba gukorwa kinyamwuga kandi mu buryo bwiza."

Yabakanguriye kugira intego n'icyerekezo cy'akazi hashingiwe ku muvuduko w'iterambere igihugu cyacu gifite muri iki gihe.

Yagize ati:"Igenamigambi ry'ibikorwa ndetse n'imiyoborere iboneye by'amasosiyete atwara abagenzi birushaho guteza imbere ubucuruzi ndetse bikarinda n'impanuka zo mu muhanda."

IGP Gasana yabibasabye kwihiutisha ishyirwaho ry'iro genamigambi mu buryo bwo kubahiriza amategeko y'umuhandwa,

bityo akazi gakorwe kinyamwuga.

Umuyobozi w'Umujyi wa Kigali wungirije ushinzwe ubukungu, Parfait Busabizwa yagize ati: " Ubukungu bwa mbere u Rwanda rufite ni abaturage barwo. Ni yo mpamvu dufite inshingano zo kubarinda icyo ari cyo cyose cyahungabanya ubuzima bwabo."

Yihanangirije abatwara ibinyabiziga bamwe na bamwe bakoresha ibiyobyabwenge; aho yavuze ko hari zimwe muri raporo zerekanye ko hariho abanywa urumogi mu gihe batwaye ibinyabiziga.

Busabizwa yavuze ko uretse kuba bishyira ubuzima bwabo mu kaga, n'abagenzi ubwabo bibakururira ibibazo bikomeye.

Umuyobozi w'Ishami rya Polisi y'u Rwanda rishinzwe kubungabunga umutekano wo mu muhanda, Commissioner of Police (CP) George Rumanzi yagaragaje uko imibare y'impanuka zo mu muhanda yifashe mu mezi 14 ashize ku modoka zitwara abagenzi.

Yavuze ko kuva mu kwezi kwa Nyakanga 2015 kugera muri Kanama 2016, habayeho impanuka z'imodoka zitwara abagenzi 245, aho zuguyemo abantu 91 mu gihe abandi 408 bakomeretse ku buryo bukomeye.

CP Rumanzi yavuze ko imodoka zitwara

abagenzi zakoze impanuka ari Bisi nini 11, izo mu bwoko bwa Kwasiteri (Coasters) 128 n'izindi zirimo minibisi 106.


Yakomeje avuga ko impanuka ziterwa ahanini n'umuvuduko ukabije, kugenda nabi mu muhanda, kutubahiriza ibimenyetso by'umuhandwa birimo amatara, ibyapa, kuvugira kuri telefone utwaye ikinyabiziga, n'ibindi.

Umuyobozi w'Ishyirahamwe Nyarwanda ry'Amakoperative atwara abagenzi (RFTC) Colonel (Rtd) Ludoviko Twahirwa yavuze ko hashyizweho ishuri ryihariye ryo gufasha by'umwihariko abatwara za bisi.

Yagize ati:"Ntitugomba gukoresha umushoferi uwo ari we wese udafite icyemezo cy'umukoresha we wa mbere kuko byagaragaye ko hari igithe umushoferi ava ahantu runaka kubera kwitwara nabi mu kazi akaja kwaka akazi mu yindi Sosiyete. Iki rero ni ikibazo tugomba guhagurukira tutagikemura burundu."

Inama yasojoje yemeza ko mu kwezi kumwe mu modoka zitwara abagenzi hazakomeza gushyirwamo utwuma dupima umuvuduko w'imodoka; kandi abatwara abagenzi bagahabwa amakarita y'akazi.

" Ubukungu bwa mbere u Rwanda rufite ni abaturage barwo. Ni yo mpamvu dufite inshingano zo kubarinda icyo ari cyo cyose cyahungabanya ubuzima bwabo."



Abaminisitiri n'Abayobozi ba Polisi bo muri aka karere bihereye ijisho imyitozo ku kurwanya ibyaha byifashisha ikoranabuhanga

Abaminisitiri bafite Polisi mu nshingano n'abayobozi bazo bo mu bihugu byo muri aka karere bagize Umuryango w'ubufatanye mu kurwanya ibyaha (Eastern Africa Police Chiefs Cooperation Organization - EAPCO) basuye abapolisi baturuka mu bihugu bikagize bari mu myitozo muri Camp Kigali yo ku rwego rwo hejuru ku kurwanya no gukumira ibyaha byifashisha ikoranabuhanga.

Abo ba Minisitiri n'abayobozi ba Polisi bari i Kigali mu Nama Rusange ya 18 y'Abayobozi ba Polisi zo muri aka karere (EAPCO) yari ifite Insanganyamatsiko igira iti:"Guteza imbere ubufatanye no kunoza imikoranire mu kurwanya ibyaha byifashisha ikoranabuhanga."

Nk'uko Commissioner of Police (CP) Felix Namuhoranye, akaba n'Umuhuzabikorwa w'iyo myitozo yabivuze, icyo gikorwa cyari kigamije kuberekwa ishusho nyayo y'imyitozo n'imigendekere yayo.

Yagize ati:"Abaminisitiri bafite Polisi mu nshingano ndetse n'abayobozi bazo baje kwihera ijisho uko imyitozo imeze kubera ko iri mu bikorwa bimirije imbere. Kugira ngo ibyaha bikorwa hifashishijwe ikoranabuhanga birwanywe biasaba ubufatanye , imikoranire myiza no guhanahana amakuru ku gihe hagati y'inzezo bireba."

Mu byaranze iyo myitozo yateguwe na Polisi y'u Rwanda ifatanyije na Polisi Mpuzamahanga (Interpol) harimo gushyira

mu bikorwa ubumenyi ku kurwanya ibyaha byifashisha ikoranabuhanga.

Iyo myitozo yibanze ku gukusanya no gusesengura ibimenyetso by'ibyaha, kubika amakuru , kuyahanahana, gufata abacyekwa gukora ibyaha, gukoresha itumanaho rya Polisi Mpuzamahanga (I-24/7), no gukora ipererezwa ku icuruzwa ry'abantu.

Abayitabiriye bakoze umwitozoshusho aho umukobwa w'imyaka 20 y'amavuko utishoboye yajyanywe mu mahanga n'agatsiko k'abacuruza abantu bamubeshyo ko bazamushakirayo imirimio.

Avuga kuri uwo mwitozo, CP Namuhoranye yagize ati: "Uburo abagenzacyaha bakoresheje mu kugenza iki cyaha harimo kureba niba hari ubutumwa uwo mukobwa yohrererezanyije kuri telefone cyangwa kuri murandasi n'abamujiyanje, uko byagenze (niba byarabayeho), uko byatangiye, aho bamujyanye.. muri make bagerageje uburyo bwose bushoboka kugira ngo babone amakuru yose ajyanye n'uko icyo cyaha cyakozwe kugeza bamenye aho uwo mukobwa aherereye , baramugarura ndetse bafata abamujiyanje."

Yakomeje agira ati:"Uko ikoranabuhanga rirushaho gutera imbere ni ko abantu baryifashisha mu gukora ibyaha bitandukanye. Iyi myitozo itanga

ishusho y'imikoranire ikwiriye hagati y'ibihugu ndetse na Polisi zabyo aho bisabwa guhanahana amakuru kugira ngo ibyaha ndenga mipaka birusheho kurwanya."

CP Namuhoranye yagize kandi ati:"Ndizera ndashidikanya ko ku musozo w'iyo myitozo tuzasanga ko ubufatanye atari amahitamo ahubwo ko ari ngombwa kugira ngo ibyaha ndenga mipaka bibashe gutahurwa, kugenzwa, kumenya ababikoze, aho baherereye, kubafata no kuboherenza mu bihugu bibashakisha kugira ngo bagezwe imbere y'inkiko."

Mathew Simon, ukorera ku cyicaro cya Polisi Mpuzamahanga i Singapore, akaba n'umwe mu bagenzi b'iyo myitozo yavuze ko icuruzwa ry'abantu ari kimwe mu byaha bihangayikishije ibihugu n'isi muri rusange aho abibasirwa ari abafite imibereho itari myiza."

Yagize ati:"Mu byaha bikorwa hifashishijwe ikoranabuhanga harimo iby'inzaduka nk'ubwicanyi bw'uburyo butandukanye, gufata ku ngufu n'ubwabuzi bushukana bw'amafaranga hakoreshejwe telefone nka kimwe mu bikoresho byifashishwa mu gukora ibyo byaha ku buryo bisaba ubufatanye mu kubirwanya no kubikumira." Iyi myitozoyabereye mu Rwanda yari ibaye ku nshuro ya kane. Yitabiriwe n'abagera ku 100 baturuka mu bihugu bitandukanye byo ku mugabane wa Afurika .

Ubufatanye mu kurwanya no gukumira ibyaha no gusangira ubunararibonye binyuze mu mahugurwa biri mu byo Polisi y'u Rwanda yimirije imbere.



Abahoze ari abazunguzayi bahawe isoko rya kijyambere bazajya bakoreramo

Minisitiri w'Uburinganire n'Iterambere ry'Umuryango, Dr Diane Gashumba yavuze ko iri soko rishya rihawe abahoze bacururiza mu muhanda bazwi ku izina ry'abazunguzayi rije ari ingamba y'inrongera mu guteza imbere umutekano, imibereho myiza y'abaturage no kwihutisha iterambere.

Yavuze aya magambo ku itariki ya 3 Nzeri 2016 afungura ku mugaragaro isoko rya kijyambere ry'agaciro ka miliyonu 192 z'amafaranga y'u Rwanda, ryubatse muri Nyabugogo, mu karere ka Nyarugenge, rikaba ryarubakiwe abazunguzayi.

Minisitiri Gashumba avuga ku buryo imodoka yihuta ishobora kugonga umzunguzayi wiruka mu mugazi yagize ati: "Iri soko ni igisubizo ku mutekano mucye washoboraga gaterwa n'ubucuruzi bwo mu muhanda."

Iri soko ryubatswe n'Umujyi wa Kigali ku bufatanye n'abandi bafatanyabikorwa, barimo za minisiteri, inzego z'umutekano n'abikorera; rikaba rishobora kwakira abacuruzi 3200.

Minisitiri Gashumba yagize kandi ati: "Nta kuntu ubucuruzi bwanyu bwatera imbere mukorera mu muhanda. Abensi muri mwe ni abagore, muri iri soko muhafite ingwate, bikaba ari icyifuzo cya Nyakubahwa Perezida Paul Kagame cy'uko nibura 50% by'abagore bazaba bashobora gukorana n'amabanki mu mwaka wa 2017

Isoko rya Nyabugogo ryubatswe ngo hatezwe imbere umutekano, ubucuruzi no

guca intäge ubucuruzi butemewe.

Yahuje itahwa ryaryo n'ubukangurambaga bw'isuku n'umutekano bukomeza, bwatangiwe na Polisi y'u Rwanda n'Umujyi wa Kigali, agira inama abagiye kurikoreramo kurigirira isuku.

Aha yagize ati: "Mwibuke ko kubungabunga umutekano atari akazi ka Polisi gusa, nimwe bitangiriraho. Mufite abashinzwе umutekano mugomba kuzakorana bya hafi kandi mugashakira umutekano iri soko."

Mi ijambo rye muri uyu muhango, Meya w'Umujyi wa Kigali Monique Mukaruriza yagarutse ku bufatanye bw'Umujyi wa Kigali na Polisi y'u Rwanda mu by'isuku n'umutekano maze agira ati: "Isoko rya kijyambere rya Nyabugogo ryubatswe ngo hatezwe imbere ubucuruzi bwemewe n'umutekano muri uyu mujyi.."

Umuyobozi mukuru wa Polisi y'u Rwanda, IGP Emmanuel K. Gasana yagize ati: "Ubucuruzi bwo mu muhanda bwari ikibazo ku mutekano, bwatezaga akajagari kandi bukabangamira iterambere mu mijyi yacu, tugomba gufatanya kubuhagarika."

Aha yagize ati: "Iri soko rije ari icyerekezo nk'uko Umukuru w'igihugu ahora abiduhamo inama, ni inshingano gushaka umuti w'ibibazo byacu nk'abanyarwanda,.. iri soko rero ni kimwe mu bisubizo biteza imbere abanyarwanda."

Yakomeje yizeza ubufatanye mu by'umutekano w'abazaruriza muri iri soko ariko abagira inama yo gukorera mu mashyirahamwe kuko ari bwo buryo

bwoshrye baboneramo n'inkunga.

Daniel Byishimo, umuhuzabikorwa w'iri soko yashimiye inzego zitandukanye zahuje imbaraga ngo iri soko ryubakwe.

Iri soko ryubatswe nyuma y'ibarura ryakozwe rigaragaza ko mu Mujyi wa Kigali harimo abazunguzayi bagera ku 8300, mu gihe 5000 muri bo bakaba bakorera mu karere ka Nyarugenge.

Mu gushaka igisubizo, hubatswe amasoko 12 mu duce dutandukanye tw'Umujyi yo gufasha abacururiza mu muhanda kuwuvamo no gukorera ahemewe.

Abazakorera mu isoko rya Nyabugogo ryatashwe ejo, basonewe gutanga imisoro n'ubukode mu gihe cy'umwaka. Ubundi badasonewe, bakagomye kwishyura miliyonu 410 z'imisoro.

" Isoko rya
kijyambere rya
Nyabugogo ryubatswe
ngo hatezwe imbere
ubucuruzi bwemewe
n'umutekano muri
uyu mujyi.."

Abapolisi b'u Rwanda bambitswe imidari muri Sudani y'Epfo



Abapolisi b'u Rwanda 240 bakorera hamwe (Formed Police Unit-FPU) mu butumwa bw'amahoro bw'Umuryango w'Abibumbye muri Sudani y'Epfo (UNMISS), ku italiki 15 Kanama bambitswe imidari yishimwe kubera akazibako zemuri iki gihugu.

By'umwihariko, bashimiwe akazi bakoze mu duce twa Upper Nile na Malakal mu majyaruguru y'iki gihugu.

Umuyobozi w'abapolisi bose bari mu butumwa bw'amahoro muri iki gihugu, CP Bruce Munyambo ni we wahagarariye intumwa idasanzwe y'Umunyamabanga Mukuru wa Loni muri Sudani y'Epfo muri uwo muhango.

Mu ijambo rye, CP Munyambo yabagejejeho ubutumwa bushima abapolisi b'u Rwanda bari muri UNMISS ku bunyamwuga n'imiyitwarire myiza bagaragaje mu gihe cy'umwaka bamaze bafatanya n'abandi kugarura amahoro no kubungabunga umutekano muri iki gihugu.

Munyambo yababwiye ati: "Mwagaragaje umurava udasanzwe, mwihesheje agaciro, mwagahesheje Umuryango w'Abibumbye ndetse n'igihugu muhagarariye." Yongeyeho agira ati: "Tumaze hafi umwaka dukorana; ariko uko nababonye nta gushidikanya ko mwagaragaje ubunyamwuga mu gutanga umusanzu mu kugarura amahoro muri iki gihugu. Tubashimiye byimazeyo kubera umusanzu mwatanze."

Yabasabye gukorera hamwe kugira ngo Sudani y'Epfo ibe igihugu cy'amahoro n'amajyambare arambye.

Uhagarariye Umuyobozi w'Ibiro bya Upper Nile muri Malakal, Hastings Amurani yagize ati: "Nta gitunguranye kirimo kuba abapolisi b'u Rwanda babaye ba ambasaderi beza b'igihugu cyabo n'ibendera rya Loni,.. Imiyitwarire myiza yabo ku baturage yagaragaye bakigera hano. Umurava no kwihangana kwabo byagaragaye mu nzego

zose dore ko byanashyiraga ubuzima bwabo mu kaga; turabashima ko batigeze biganda."

Mu ijambo rye, Umuyobozi w'Abapolisi b'u Rwanda bari muri ubu butumwa bw'amahoro, ACP Rogers Rutikanga yabwiye abamitswe imidari ko babikesha umuhati ku kazi n'imikoranire myiza n'abaturage bari bashinzwe kurindira umutekano.

"Nta gitunguranye kirimo kuba abapolisi b'u Rwanda babaye ba ambasaderi beza b'igihugu cyabo n'ibendera rya Loni,.. Imiyitwarire myiza yabo ku baturage yagaragaye bakigera hano. Umurava no kwihangana kwabo byagaragaye mu nzego zose dore ko byanashyiraga ubuzima bwabo mu kaga; turabashima ko batigeze biganda."



Abayobozi Bakuru ba Polisi z'u Rwanda na Uganda baganiriye ku kurwanya ibyaha ndenga mipaka



Umuyobazi Mukuru wa Polisi ya Uganda, General Kale Kayihura yavuze ko ikusanyabukungu n'iterambere ry'ikoranabuhanga bituma urwego rw'umutekano rumwe rudashobora kubikemura hatabaye imikoranire y'inzezo zitandukanye.

IGP Kayihura yavugyi ibi mu nama yahuzaga inzezo za Polisi y'u Rwanda n'ya Uganda yabereye ku cyicaro gikuru cya Polisi y'u Rwanda ku Kacyiru ku itariki 16 Kanama.

Yagize ati:"Hari byinshi inzezo zacu zigomba kunganiranamo kugira ngo turwanye ibyaha byugarije ibihugu byacu, kandi ni ngombwa ko dukomeza kwiga no gufashanya kuko igihe muri Uganda hazaba harangwa umutekano mucye nta kabuza byagira ingaruka ku Rwanda, akaba ari yo mpamvu tugomba gukorana bya hafi nk'ikipe imwe."

Polisi y'u Rwanda n'ya Uganda zasinyanye amasezerano y'imikoranire mu gukumira no kurwanya ibyaha ndenga mipaka, muri ayo masezerano hakaba harimo ingingo ivuga ko hazabaho ubufatanye mu kongerera ubumenyi n'ubushobozi abapolisi b'impande zombi binyuze mu mahugurwa, gusangira ubunraribonye, gukorera hamwe imikwabu ku mipaka ibihugu bihuriyeho, kurwanyiriza hamwe icuruzwa ry'abantu no kurwanya ibyaha ndenga mipaka no kongerera ubushobozi abapolisi mu nzego zitandukanye.

Gen. Kayihura n'intumwa yari ayoboye yashimiye ubuyobozi bw'u Rwanda

muri rusange n'ubwa Polisi y'u Rwanda by'umwihiro kuko bwakoze ibishoboka byose mu guteza imbere Polisi.

Yavuze ati:"Biratangaje kubona ibyo mumaze kugeraho mu gihe gito, iki ni ikimenyetso cy'ubuyobozi bwiza bw'igihugu cyanyu."

Izo ntumwa zeretswe imikorere y'ishami rya Polisi y'u Rwanda rishinzwe umutekano wo mu muhanda n'ibyo ritegenya gukora ngo rinoze imikorere yaryo.

Mu byo iri shami riteganya gukora harimo gukoresha ikoranabuhanga mu ikoreshwa ry'ibizamini by'abashaka impushya zo gutwara ibinyabiziga, bikaba bitemanyijwe ko iri koranabuhanga rizatangira gukoreshwa mu myaka ibiri iri imbere.

IGP Kayihura n'intumwa ayoboye basuye kandi Ikigo cy'igihugu gishinzwe kugenzura imirimo ifitiye igihugu akamaro mu Rwanda (RURA) aho basobanuriwe imikorere yacyo mu igenzura ry'amafaranga yinjizwa n'Ibigo by'itumanaho buri munsi.

Umuyobozi Mukuru wa Polisi y'u Rwanda, IGP Emmanuel K. Gasana yashimiye imikoranire n'ubutwererane bugaragara hagati y'inzezo za Polisi z'ibihugu byombi bugaragarira cyane mu gusangira ubunraribonye no kwigira hamwe uko ibibazo by'umutekano byakemuka.

Yagize ati:"Ubutwererane n'imikoranire myiza yatumye dufatira hamwe ingamba z'uko twarwanyiriza hamwe ibyaha ndengampaka."

Musanze: Urubyiruko 117 rwabaye abakorerabushake mu gukumira ibyaha

Nyuma y'inama yahuje urubyiruko nrwo mu murenge wa Busogo, mu karere ka Musanze ku itariki ya 4 Kanama, muri rwo 117 rwahise rufata icyemezo cyo kuba abanyamuryango b'Ithuriro ry'urubyiruko Nyarwanda rw'abakorerabushake mu kurwanya no gukumira ibyaha muri uyu murenge (Rwandan Youth Volunteers In Community Policing-RYVCPO).

Rwafashe iki cyemezo nyuma y'ikiganiro ku ruhare rw'urubyiruko mu kurwanya no gukumira ibyaha rwahawe n'ushinzwe imikoranire ya Polisi y'u Rwanda n'abaturage ndetse n'izindi nzego muri Musanze, Inspector of Police (IP) Viateur Ntiyamira, n'Umuhuzabikorwa w'iri Huriro muri aka karere, Murangamirwa Theodore. IP Ntiyamira yabwiye urwo rubyiruko ati:"Ibyaha bitandukanye bigaragara muri aka karere akensi bikorwa n'abanyoye ibiyobyabwenge, mwe maboko y'igihugu murasabwa kubyrinda."

Yakomeje ababwira ati:"Urubyiruko muhura n'ibishuko byinshi cyane cyane abakobwa. Mwirinde ababizeza ibitangaza ko bazabashakira imirimo myiza kuko hari ababa bashaka kubashora mu icuruzwa ry'abantu cyangwa mu busambanyi."

Murangamirwa yashimiye abo banyamuryango bashya, maze abasaba kuba intangarugero, aha akaba yarababwiye ko kugira ngo ibyo babigereho bagomba kwirinda ikibi aho kiva kikagera, kandi bagakangurira n'abandi kukirinda.

Yagize ati:"Mu by'ukiri, urubyiruko ni twe dukwiye gufata iya mbere mu kwicungira umutekano, tugatanga umusanzu mu kurwanya no gukumira ikintu cyose gishobora kuwuhungabanya, tukarushaho gukorera no gukunda igihugu no kurinda ibyagezweho."

Aba banyamuryango 117 bashya baje biyongera ku bari basanzwe bagize iri huriro muri uyu murenge bagera kuri 12.

Abakomiseri bagiye mu kiruhuko cy'izabukuru harimo Komiseri Bakuru bungirije ba Polisi (Deputy Commissioner Generals –DCGs) Stanley Nsabimana na Mary Gahonzire, Komiseri wa Polisi (Commissioner of Police-CP) Cyprien Gatete, n'Abakomiseri bungirije ba Polisi (Assistant Commissioners of Police -ACPs) Dr. Wilson Rubanzana, Sam Karemera, Francis Nkwaya, Joseph Rudasingwa na Jimmy Hodari.

Umuhangano wo gusezerera ku mugaragaro abo bapolisi wabereye ku cyicaro gikuru cya Polisi y'u Rwanda ku Kacyiru ku wa gatatu tariki 3 Kanama.

Ubwo yabagezagaho ubutumwa bwa Nyakubaha Perezida wa Repubulika, Minisitiri w'Umutekano mu gihugu, Sheikh Musa Fazil Harerimana yabashimiye uko bitanze mu kazi bagira uruhare mu kubaka igihugu kibereye buwi wese.

Yagize ati: "Uyu munsi turizihiza ubwitange, ubunyangamugayo no gukunda igihugu mwagaragaje mu guteza imbere igihugu cyanyu. Nyakubaha Perezida wa Repubulika arabashimira ubwitange no gukora mutizigamye kugira u Rwanda rube urwo ari rwo uyu munsi. Ubuzima bushya mugije gutangira bugomba gukomeza guhesha isura nziza igihugu n'urwego rwa Polisi mwagize uruhare mu kubaka."

Yakomeje ababwira ati: "Uruhare rwanyu mu kubaka igihugu ntirurangiriye aha, muracyari mu muryango wa Polisi kandi igihugu kiracyabakeneye mu bundi buryo."

Minisitiri Harerimana yababwiye kandi ati: "Mujye mwibuka ko abapolisi basigaye mu kazi babafata nk'urugero rwabo ndetse nk'abantu

Abapolisi 308 muri Polisi y'u Rwanda bagiye mu kiruhuko cy'izabukuru



b'inyangamugayo, ubumenyi n'ubunararibonye mufite bizakomeze guteza imbere igihugu."

Yaboneyeho umwanya wo gushimira abafasha babo kubera ukwihangana no kubashyigikira ubwo bari mu kazi.

Nsabimana wavuze mu izina ry'abagiye mu kiruhuko, yashimye Perezida wa Repubulika y'u Rwanda Paul Kagame kubera ubuyobozi bufite icyerekezo bwatumye baba abo baribo ubu. Yagize ati: "Iki gihugu cyatugize abo turi bo ubu, twatojwe indangagaciro z'Abanyarwanda kandi turaziharanira.

N'ubwo tuvuye mu gipolisi, Polisi y'u Rwanda iracyari umuryango wacu, tuzakomeza kubarizwamo; kandi twiteguye gukoresha ubunraribonye bwacu no gukorera igihugu igihe cyose kizadukenera."

Yavuze ko ubwo Polisi y'u Rwanda yashingwaga mu myaka 16 ishize yagiye ihura n'ibibazo bitandukanye mu kubaka Polisi ikora kinyamwuga.

Aha yagize ati: "Turishimira ko twabigezeho. Uyu munsi dufite Polisi ikomeye kandi ikorera abanyarwanda ndetse no hanze y'igihugu; kandi tunishimiye kuba twaragize uruhare mu kubaka igipolisi gikomeye kandi gifite icyerekezo kandi twijeje ko tuzakomeza kugikorera na nyuma y'aha."

Aba bagiye mu kiruhuko cy'izabukuru banahawe ibyemezo by'ishimwe (Certificates of Merit) mu rwego rwo kubashimira ubwitange bwabo mu kugarura amahoro n'umutekano mu gihugu.



Polisi y'u Rwanda yatashye icyicaro cyayo mu Ntara y'Amajyepfo



Polisi y'u Rwanda yatashye ku mugaragaro inyubako nshya y'icyicaro cyayo mu Ntara y'Amajyepfo iri mu Mujiyi w'akarere ka Huye, ikaba ifite agaciro ka miliyoni 680 z'amafaranga y'u Rwanda.

Minisitiri w'Umutekano mu gihugu, Sheik Musa Fazil Harerimana ni we wayoboye uwo muhango wabaye ku wa 20 Nyakanga.

Uwo muhango witabiriwe kandi n'Umuyobozi Mukuru wa Polisi y'u Rwanda, Inspector General of Police (IGP) Emmanuel K Gasana, Umuyobozi w'Intara y'Amajyepfo, Alphonse Munyentwari n'abandi bayobozi bo nzego zitandukanye.

Iyo nyubako y'amagorofa abiri

ifite ibyumba 37.Yubatswe mu mezi 12 ku buso bwa 6727 m2.

Ifite ibyumba bibiri by'inama, Sitasio ya Polisi ifite ibyumba bibiri bifungirwamo byujuje ibyangombwa, icyumba kiganirizwamo abahungabanye cyangwa bahohotewe, ikagira n'aho bahagarika imodoka hanini ndetse n'ibusitani.

Irimo kandi ibiro by'ubuyobozi bwa Polisi mu karere ka Huye n'ibya Sitasio ya Polisi ya Ngoma.

Mu ijambo yagejeje ku bitabiriye uwo muhango, Minisitiri Harerimana yavuze ko iyi nzu yubatswe bijyanje na gahunda ya Polisi y'u Rwanda yo kwiyubaka.

Yagize ati:"Turashimira abafatanyabikorwa bose mu iyubakwa kw'yi nzu, kandi binyuze muri ubwo bufatanye tuzagera no ku bindi byinshi."

Polisi y'u Rwanda irimo gusoza izindi nyubako eshatu z'ibycari byayo i Musanze mu Majyaruguru, Rubavu mu Burengerazuba na Rwamagana mu Ntara y'Iburasirazuba. Munyentwari yashimye Polisi y'u Rwanda agira ati:" Iki gikorwa gishimangira iterambere ry'imikoranire myiza ya Polisi n'izindi nzego ndetse n'abaturage mu kwishakamo ibisubizo."

Umuvgizi Mukuru wa Polisi y'u Rwanda, Assistant Commissioner of Police (ACP) Celestin Twahirwa yavuze ko ibi biri muri gahunda ya Polisi y'u Rwanda yo kwiteza imbere mu bikorwaremezo.

Yagize ati:"Kugeza ubu, icyicaro gikuru cya Polisi y'u Rwanda ku Kacyiru, icya Polisi y'Umujyi wa Kigali i Remera byararangije kandi izindi nyubako eshatu z'ibycaro bya Polisi mu ntara bizarangira vuba.



Musanze: 300 bahawe ubumenyi bwo kuzimya bwo ku nkongi z'imiriro



Abantu 300 baturuka mu nzego zitandukanye mu karere ka Musanze ku itariki 22 Kanama bahuguwe na Polisi y'u Rwanda ku gitera inkongi z'imiriro, uko bazirinda, n'uko bazizimya zibaye.

Mu bahuguwe harimo abayobozi b'inzezo z'ibanze, abikorera, ba nyiri amahoteri na bamwe mu bayakoramo, abakozi b'Ibitaro bikuru bya Ruhengeri, abafite inganda na bamwe mu bazikoramo.

Ayo mahugurwa y'umunsi umwe yabereye mu kagari ka Kigombe ho mu murenge wa Muhoza.

Yitabiriwe kandi n'abafite Sitisayo zicuruza ibikomoka kuri Peterori, abayobozi ba Kompanyi zitwara abagenzi mu modoka n'tabanyeshuri biga mu Ishuri Rikuru ry'Ubumenyi ngiro rya Musanze (Musanze

Integrated Polytechnic College-MIPC). Ayatangiza ku mugaragaro, Umuyobozi

w'akarere ka Musanze, Musabyimana Jean Claude yagize ati:"Inkongi z'imiriro zidindiza iterambere. Kugira ubumenyi ku kizitera bituma zirindwa."

Yashimye Polisi y'u Rwanda kuri ayo mahugurwa kandi asaba abayitabiriye kuyakurikra neza.

Mu butumwa bwe, Umuyobozi wa Polisi y'u Rwanda muri aka karere, Senior Superintendent of Police (SSP) Felix Bizimana yabwiye abayitabiriye ko ibitera inkongi z'imiriro harimo gukoresha ibikoresho by'amashanyarazi nk'intsinga bitujuje ubuziranenge cyangwa bishaje.

Yabagiriye inama yo kugura no gushyira ibikoresho by'ibanze byo kuzimya inkongi z'imiriro (Fire extinguishers) mu nzu batuyemo ndetse n'izo bakoreramo kandi abasaba kwita ku buzima bwabyo babisuzumisha ko bikiri bizima.

SSP Bizimana yababwiye ko igithe habaye inkongi y'umuriro bagomba guhita bakupa amashanyarazi kandi bagahita babimenyesha Polisi y'u Rwanda kuri numero za telefone zitishyurwa 111 n' 112.

Yabasabye kujya bazimya ibikoresho byose bikoresha amashanyarazi nka televiziyo, radiyo, ipasi na mudasobwa igithe batari kubikoresha.

Umwe mu bitabiriye ayo mahugurwa witwa Dufatanye Bonaventure yagize ati:"Nta bumenyi buhajije nari mfite ku kwirinda inkongi z'imiriro. Nabimenyeye muri aya mahugurwa.Ubumenyi nungutse buzatuma ndwanya inkongi z'imiriro."

Yashimye Polisi y'u Rwanda kuri ubwo bumenyi kandi avuga ko azabusangiza abo mu muryango we, abo ahagarariye ndetse n'abaturanyi be.



Intumwa y'Umuryango w'Abibumbye yashimye imikorere y'Abapolisi b'u Rwanda bari mu butumwa bw'amahoro muri Centrafrika

Umujyana mu wungirije mu bya gipolisi mu Muryago w'Abibumbye, Shaowen Yang yashimye Abapolisi b'u Rwanda bari mu butumwa bw'amahoro muri Repubulika ya Centrafrika (United Nations Multidimensional Integrated Stabilization Mission in Central African Republic - MINUSCA) kubera ubunyamwuga n'imyitwarire myiza mu mirimo bakora.

Yang yabitangarije mu Muji wa Bangui ku itariki 2 Kanama ubwo we n'izindi ntumwa z'Umuryango w'Abibumbye basuraga Umutwe w'Abapolisi b'u Rwanda bari muri ubu butumwa bw'amahoro aho bashinzwe umutekano w'abayobozi batandukanye b'inzego za Leta z'iki gihugu (Protection Support Unit - RWAPSU).

Yashimye U Rwanda kubera uruhare rwarwo mu kugarura amahoro no kubungabunga umutekano mu bihugu bitandukanye ku Isi harimo n'iki cya Centrafrika.

Mu ijambo rye, Yang yagize ati: "Ndashima Polisi y'u Rwanda mbivanye ku mutima kubera uruhare rwayo mu kugarura amahoro muri iki gihugu. Iki ni ikimenyetso kigaragaza ko Abanyarwanda biyemeje gusigasira umutekano ku Isi. Aho abapolisi b'u Rwanda bari mu butumwa bw'amahoro barangwa n'imyitwarire myiza."

Yang n'abari bamuherekeje barimo Umuyobozi wa MINUSCA, Louis Carlo bahawe ikaze n'uyoboye Abapolisi b'u Rwanda bari muri ubu butumwa bw'amahoro, Assistant Commissioner of Police (ACP) Benoit S. Kayijuka wababwiye kandi abasobanurira inshingano zabo zirimo kurinda abayobozi b'inzego za Leta z'iki gihugu, bakaba ari bo barinze umutekano w'Umushumba Mukuru wa Kiriziya Gaturika ubwo yasuraga iki gihugu mu minsi ishize.

Polisi y'u Rwanda ifite abapolisi 370 mu butumwa bw'amahoro muri



Centrafrika barimo abakora imirimo y'ubujyanama (Individual Police Officers - IPO), abakorera hamwe imirimo rusange (Former Police Unit (FPU), n'abashinzwe kurinda abayobozi b'inzego z'ubuyobozi muri iki gihugu (PSU).





Polisi y'u Rwanda yungutse aba polisi 429

Minititiri w'umutekano mu gihugu, Sheikh Musa Fazil Harerimana, ku wa 29 Nyakanga yayoboye umuhango wo gusoza amasomo y'abofisiye bashya 429 ba Polisi y'u Rwanda barangije icyiciro cya 8.

Uwo muhango wabereye ku ishuri rya Polisi y'u Rwanda riri mu murenge wa Gishari akarere ka Rwamagana (Gishari Training School - PTS).

Minisitiri Harerimana wari uhagarariye Perezida wa Repubulika muri uwo muhango, yahaye abo bofisiye ipeti rya Assistant Inspector of Police (AIP).

Abarangije batangiye amasomo muri Gicurasi 2015. Barimo 55 b'igitsina gore n'abanyamahanga barimo icumi bakomoka muri Sudani y'Epfo, babiri bo muri Uganda na babiri bo muri Namibia.

Mu barangije kandi harimo 10 bo mu rwego rw'ighugu rushinzwe imfungwa n'abagororwa; bakaba na bo barahawe ipeti rya Assistant Inspector of Prisons.

Iki ni icyiciro cya kane giherewe amasomo mu ishuri rya Polisi y'u Rwanda riri i Gishari, ibindi byiciro bikaba byarigiraga mu Ishuri Rikuru rya Polisi y'u Rwanda riri mu karere ka Musanze (National Police College-NPC).

Amaze guha ipeti abo bofisiye bashya, Minisitiri Harerimana yabashimiye uko bitwaye bakarangiza neza amasomo bamazemo amezi 15 agira ati:"Amahugurwa nk'aya ni ingirakamaro kuri Polisi y'u Rwanda. Yongerera ubumenyi abapolisi, maze bigatuma buzuza neza inshingano nyamukuru igihugu n'abanyarwanda babatezeho zo kurinda neza umutekano w'abantu n'ibyabo."

Yanavuze ko amahugurwa nk'aya afasha Polisi y'u Rwanda kugera ku cyerekezo yiyeje cyo gutanga serivise zinoze, gukorera mu mucyo, guharanira ko amategeko yubahirizwa no gufasha abaturawanda kuba mu gihugu gifite umutekano usesuye.

Minisitiri Harerimana yakomeje agira ati:"Ibi twabitewe n'uko tuzi neza ikiguzi cyo kutagira umutekano, urugero rwa hafi ni inzirakarengane zirenga miliyoni zazize Jenoside yakorewe Abatutsi mu 1994. Iyo u Rwanda ruza kuba rufite ubuyobozi bwiza n'inzego z'umutekano zikora neza kandi ziharanira inyungu z'ighugu n'abagityue bose, ntituba twaratatakaje abantu."

Yavuze kandi ko kubumbatira umutekano no kuwugiramo uruhare bireba buri wese

nk'uko Nyakubawa Perezida wa Repubulika Paul Kagame ahora abitwibutsa.

Yababwiye ko iterambere igihugu kimaze kugeraho mu nzego z'imiyoborere myiza, ubutabera, n'ubukungu ritari kugerwaho iyo inzego z'umutekano zitabigiramo uruhare, aboneraho n'umwanya wo gushimira Polisi y'u Rwanda kubera uko yuzuza inshingano zayo kinyamwuga haba mu gihugu imbere no hanze yacyo aho iba yagiye kubahiriza amahoro.

Yabwiye abarangije amasomo ati:"Kuba Ofisiye mu nzego z'umutekano bijiana n'inshingano ziremereye. Ofisiye agomba kuba ikimenyetso cyo gukunda igihugu, kugikundisha abo ayobora n'abamuguna bose kandi Ofisiye wese agomba guhora yiteguye kwitangira igihugu cye kabone n'yo byamusaba gutanga ubuzima bwe."

Ku banyamahanga bahaweye aya masomo na bo yabashimiye uko bitwaye, anashimira ibihugu byabo kuba byarahisemo ko u Rwanda rubahera amasomo abapolisi.

Minisitiri Harerimana yasoje ashimira ababyeyi b'abo bofisiye bashya kuba baremeye ko abana babo bakorera igihugu.

Umuyobozi wa PTS, Commissioner of Police (CP) John Bosco Kabera, yavuze ko amasomo nk'aya atuma abari basanzwe ari abapolisi bato biyongera ubumenyi, naho abatari bo bakagira ubumenyi bubashyira ku rwego rw'abayobozi.

Yababwiye ati:"Turizera ko amasomo mwaherewe aha azabafasha gufata imyanzuro n'ibyemezo bikwiye mu kazi."

Abarangije bahaweye amasomo andatukanye yerekanye ahanini n'inshingano za Polisi y'u Rwanda harimo gukoresha intwarz mu kubungabunga umutekano, kubungabunga amahoro ku isi, ikoranabuhanga n'itumanaho, amategeko, imikoranire ya Polisi n'abaturage mu gukumira ibyaha, amategeko y'umuhanda ndetse n'ubutabazi bw'ibanze.





Polisi y'u Rwanda yaganirije abamotari ku mutekano

Umuyobozi Mukuru wa Polisi y'u Rwanda (IGP) Emmanuel K. Gasana yasabye abamotari bakorera mu mujyi wa Kigali kugira uruhare mu kwicungira umutekano, cyane cyane barushaho kubahiriza amategeko y'umuhandwa no gutangira amakuru ku gihe.

Ibi yabivugiye kuri sitade nto ya Kigali aho yahuriye n'aba bamotari nyuma y'umuganda ngarukakwezi wabaye ku wa gatandatu tariki ya 27 Kanama, abashimira uruhare bagira mu kwicungira umutekano n'iterambere ry'igihugu, anabakangurira kubahiriza amategeko ndetse anagaya bamwe muri bo bahesha isura mbi umwuga bakora.

Yababwiye ati:"Umwuga mukora ufitiye igihugu akamaro, muwiteho kandi muwukore kinyamwuga. Igihugu kizirikana uruhare rwanyu mu iterambere ryacyo no mu mutekano wacyo, ariko turanabasaba kumenya abo mutwaye n'ibyo batwaye ko nta cyahungabanya umutekano."

Abo bamotari beretswe amashusho ya bamwe muri bagenzi babo bafashwe bakora amakosa bikabaviramo gukora

impanuka zavuyemo urupfu, ababaga bapakiye ibirenze ubushobozzi bwa moto zabo, ndetse n'abatwaye ibiyobyabwenge bitandukanye.

Yababwiye ati:"Murasabwa guhagurukira kurwanya ibikorwa nk'ibi kandi aho mubonye mugenzi wanyu abikora cyangwa atubahiriza amategeko, mwe ubwanyu mukamwihanira ndetse buri gihe mukamushyikiriza inzego z'umutekano."

Yabibukije kandi kurangwa n'indangagaciro za Kinyarwanda n'ubunyangamugayo.

Yagize ati:"Turashimira bamwe muri mwe bagira uruhare mu ifatwa ry'abanyabyaha batandukanye, mukomereze aho kandi mujye mutanga amakuru hakiri kare ngo ibyaha bikumirwe bitaraba."

Yanabukije nomero zitishyurwa bahamagaraho igihe bahuye n'ikibazo cyangwa babonye urenga ku mategeko, ari zo: 997 ihamagarwa n'ubonye utanga cyangwa uwakira ruswa, 113 uhuye n'ikibazo cy'impanuka, cyangwa

112 ushaka kugira ikindi usobanuza.

Izindi nomero yabahaye ni 0788311110 na 0788311502 zihamagarwa n'umuntu wese ushaka ibisobanuro mu ishami rya Polisi rishinzwe umutekano wo mu muhanda.

IGP Gasana yanabakanguriye kwirinda ibiyobyabwenge, icuruzwa ry'abantu, ubujura n'ibindi byaha.

Umuyobozi w'umuji wa Kigali wungirijwe ushinzwe ubukungu n'iterambere, Parfait Busabizwa yashimiye Polisi kubera inama idahwema kugira abamotari, aboneraho umwanya wo kubibutsa ko umutekano n'isuku bakwiye kubigira umuco, kandi bagharanira kugabanya no kwirinda impanuka.

Yagize ati:"Umutungo w'ingenzi igihugu cyacu gifite ni abantu, ntibikwiye rero ko dupfusha abantu kubera amakosa y'abantu bamwe. Nimubona bamwe muri bagenzi banyu batubahiriza amategeko mujye muhita mubimenesha Polisi."

Yabasabye kandi kugira uruhare no kwitabira gahunda za Leta kuko abantu bashyize hamwe ntacyo batageraho.

Umuyobozi w'impuzamashirahamwe y'abamotari mu Rwanda (FERWACOTAMO) Ntaganzwa Celestin, yashimiye Polisi y'u Rwanda kubera ubufatanye baftanye, anasaba ubuyobozi bwa Polisi kuzabahugurira abanyamuryango ku mategeko y'umuhandwa no kwicungira umutekano.

Rubavu: Urubyiruko rwa ADEPR rwakoze urugendo rwo kwamagana ibiyobyabwenge



Urubyiruko 350 rw'itorero rya Pantekote ryo mu Rwanda (ADEPR) ruturuka mu mirenge ya Kanzenze, Nyakiriba na Mudende ho mu karere ka Rubavu ku itariki 6 Kanama rwakoze urugendo kuri kilometero zigeru kuri enye rugamije gukangurira abantu kwirinda ibiyobyabwenge.

Urwo rugendo rwakorewe mu kagari ka Kanyirabigogwe. Rwanzagiriye ahitwa Mizingo hakorerwa ubucuruzi berekeza ku rusengero rwa ADEPR, Paruwase ya Bigogwe.

Muri ubwo bukangurambaga, urwo rubyiruko rwari rwitwaje ibyapa byanditseho amagambo agaragaza ububi

bw'ibiyobyabwenge kandi akangurira abantu kubyirinda. Rwanzagira kandi ruririmba indirimbo zikubiyemo ubutumwa bukangurira abantu gufatanya na rwo kubirwanya.

Nyuma y'urwo rugendo, urwo rubwiruko rwagiranye ibiganiro n'ushinzwe imikoraniye ya Polisi y'u Rwanda n'izindi nzego ndetse n'abaturage muri aka karere, Inspector of Police (IP) Solange Nyiraneza.

Mu butumwa bwe, IP Nyiraneza yarubwiye ko Ibiyobyabwenge biri mu bishobora kwangiza ahazaza ha rwo, maze arukangurira kubyirinda kandi bakagira uruhare mu kubirwanya musobanurira abantu ububi byabyo n'ingaruka

ubyishoyemo ahura nazo.

Yakomeje agira ati: "Ibiyobyabwenge ubwabyo birisobanuye. Biyoba ubwenge bw'uwabinyoye hanyuma agakora ibyaha bitandukanye kubera ko nta mutimanama aba igifite."

Yarubwiye ko ibyaha birimo iohotera rishingiye ku gitsina, gukubita no gukomeretsa, gufata ku ngufu no gusambanya abana bikorwa ahanini n'abanyoye ibiyobyabwenge nka Kanyanga, urumogi, Muriture, n'ibindi.

Yongeyeho ko ibiyobyabwenge bishobora kandi kubashora mu ngeso mbi nk'ubusambanyi bukurikirwa rimwe na rimwe no gutwara inda zitateganyijwe, kuva mu ishuri, no kwandura zimwe mu ndwara zandurira mu mibonano mpuzabitsina.

Yasoje arusaba kuba ijisho ry'umutekano birinda ibyaha aho biva bikagera kandi batanga amakuru yatuma bikumirwa.

Mu ijambu rye, Umushumba w'iri Torero muri aka karere, Revera Pasiteri Akoyiremeye Pierre Clavère yagize ati: "Ibiyobyabwenge biri mu bishobora kwangiza ahazaza h'urubyiruko ndetse n'abandi bantu muri rusange. Dusanzwe twigisha abayoboke bacu kubyirinda ariko twasanze uru rugendo ari ingenzi kugira ngo tugire uruhare mu gukangurira abantu b'ingeri zose kubyirinda."

Yashimye Polisi y'u Rwanda ku nama yagiriye urwo rubyiruko kandi arusaba kuzikurikiza no kuzisangiza abandi batahageze.

ntiyabona Umupolisi wo gushyira ahantu hose. Ibyo bivuze ko izindi nzego harimo n'izo mubereye abayobozzi zikwiye kuba abafatanyabikorwa mu kurwanya no gukumira ikintu cyose gishobora guhungabanya umutekano. Buri muntu arasabwa kandi kugira uruhare mu kubumbatira umutekano yirinda ibyaha kandi atanga amakuru yatuma ibyaha bikumirwa kandi yatuma hafatwa ababikoze."

SSP Habiyambere yasabye abo bayobozi b'izo nzego kugenzura ko amarondo akorwa neza, kandi bagakangurira abaturage kuba ijisho ry'umuturanyi birinda ibyaha birimo kunywa, gutunda no gucuruza ibiyobyabwenge, iohotera rikorerwa abana, irishingiye ku gitsina, n'ryo mu ngo.

Yakomeje agira ati: "Ubafatanye hagati y' inzego z'ubayobozi ni ingenzi kugira ngo umutekano urusheho kubumbatirwa no gusigasirwa. Guhanahana amakuru ku gihe bituma hamenyekana ko hari ikintu kinyuraniye n'amategeko cyabaye cyangwa kigye gukorwa bityo kigakumirwa."

Kicukiro: Inzego zose z'ubayobozi zasabwe kurangwa n'ubufatanye mu gukumira ibyaha

Umuyobozi w'akarere ka Kicukiro, Dr Nyirahabimana Jeanne yasabye inzego zose z'ubayobozi gufatanya kurwanya no gukumira ibyaha kugira ngo umutekano urusheho gusigasirwa.

Ubu butumwa yabutanze ku itariki 16 Kanama mu nama yagiranye n'abayobozi b'inzego zitandukanye bo muri aka karere bagera ku 100 barimo Abanyamabanga nshingwabikorwa b'utugari n'imirengene, abayobozi b'amadini, abakuriye Inama y'igihugu y'urubyiruko mu tugari n'imirengene n'abahagarariye Urugaga rw'abikorera mu mirengene.

Abo bayobozi barimo kandi abakuriye Urwego rwunganira uturere mu kubungabunga umutekano (DASSO),

abayobozi ba Nyanama y'utugari n'imirengene n'abahagarariye Inama y'igihugu y'abagore mu tugari n'imirengene.

Iyo nama yabereye mu kagari ka Rukatsa, ho mu murengi wa Kagarama yitabiriwe n'Umuyobozi wa Polisi y'u Rwanda muri aka karere, Senior Superintendent of Police (SSP) Gérard Habiyambere.

Mu ijambu yagejeje kuri abo bayobozi, Dr Nyirahabimana yababwiye ati: "N'ubwo inzego muhagarariye zifite inshingano zinyuranye ariko zihuriye ku nshingano yo guharanira iterambere ry'Umurturwanda n'umutekano we. Kugira ngo ibyo biggerweho murasabwa gufatanya kurwanya ibyaha kubera ko bituma ibyo bitagerwaho."

Yakomeje agira ati: "Polisi y'u Rwanda

Polisi y'u Rwanda yafashe imodoka ebyiri zibwe

Polisi y'u Rwanda mu Mujiyi wa Kigali yafashe imodoka ebyiri zibwe muri Kigali mu minsi ishize.

Izo modoka ni Carina ifite nomero ziyiranga RAB 479K ya Ronald Ngabo n'indi ifite nomero ziyiranga RAC 387Q y'uwitwa Aaron Ndenga. Zafatiwe ahantu hatandukanye ku itariki 1 Kanama mu kagari ka Mumena, ho mu murenge wa Nyamirambo, mu karere ka Nyarugenge.

Ifite nomero RAB 479K yibwe ku itariki 27 Nyakanga ivanywe aho nyirayo yari yayisize ku Gisimenti, ho mu karere ka Gasabo, naho iya kabiri yibiwe i Gikondo ku itariki 7 Nyakanga, aha hakaba ari mu karere ka

Kicukiro. Umuvugizi Mukuru wa Polisi y'u Rwanda , Assistant Commissioner of Police (ACP) Celestin Twahirwa yavuze ko umwe mu bacyekwa kwiba ifite nomero RAB 479K witwa Christian Mugisha yafashwe.

Yagize ati:"Nyuma y'aho tumenyebe ubwo bujura, tubifashijwemo n'abaturage ba Nyamirambo baduhaga amakuru, Polisi yatangiye ipererezza. Ku wa mbere nimugoroba ni bwo twamenye aho izo modoka zari zihererereye, tuhageze dusanga umwe mubakekwa kwiba imwe muri zo witwa Mugisha arimo kuyivanamo ibyuma, duhita tumufata."

Indi modoka yaje kuboneka nyuma gato

na yo yavanywemo ibyuma.

ACP Twahirwa yongeyeho ati:"Ubujuza bw'imodoka ntibusanzwe mu Rwanda, ariko n'igire bubaye, buri gihe turazifata tugaftata n'abakekwaho ubwo bujura."

Yakomeje avuga ko guhanahana amakuru ku gihe ari cyo kintu cy'ingenzi gituma ibyibwe bifatwa ndetse n'ababigizemo uruhare.

Yaboneyeho umwanya wo gusaba abaturage kwirinda kugura ibikoresho by'ibyibano no kugurira ku masoko atemewe kugira ngo ababiguze badafatwa nk'abajura cyangwa ibyitszo byabo.

Gusangira amakuru bizaca ihohoterwa rishingiye ku gitsina- Komiseri Nyamwasa

Umuyobozi wa Kigali Forensic Laboratory, Commissioner of Police (CP) Dr Daniel Nyamwasa yabwiye abaturage b'umurengene wa Kinyinya, mu karere ka Gasabo ko, bumwe mu buryo bwo gukumira ndetse no kuzandura mu minsi iri imbere ihohoterwa rishingiye ku gitsina n'irikorerwa mu ngo, ari ugasangira no guhanahana amakuru n'inzezo zishinzwe umutekano ndetse n'inzezo z'banze.

Yatanze ubu butumwa ku italiki 6 Nzeli mu nama y'ubukangurambaga yari yahuje abaturage bagera ku 2000 bo mu murenge wa Kinyinya, bukaba bwari ubukangurambaga bujyanne no kurwanya ihohoterwa rishingiye ku gitsina n'irikorerwa abana.

Nk'uko bitangazwa na Polisi, akarere ka Gasabo kari ku isonga mu byaha by'ihohoterwa ryo mu ngo n'irishingiye ku gitsina mu Mujiyi wa Kigali.

CP Nyamwasa yagize ati:"Ihohoterwa ryo mu ngo n'irikorerwa abana ribaho mu buryo butandukanye: harimo irikorerwa ku mubiri, ku gitsina, mu bitekereo no ku bukungu , rigakorerwa umwe mu bashakanye cyangwa umwana ; rirangwa n'ingaruka z'ibyo bikorwa, zikigaragariza mu ruhame cyangwa umuntu akabana nazo."

Yakomeje agira ati:" Ntimugomba gutegereza ko ubwumvikane buke bwo

mu ngo bukura kugeza aho bubyara amakimbirane; iyo mutabyitayeho nyuma mujye mumenza ko uwo mutekano muke namwe ubageraho,...mwibuke kandi ko ikigo Isange One Stop Center gihari kandi gishinzwe kwita ku bibazo nk'ibyo nta kiguzi, mukibaze umusaruro rero."

Iki kigo kimaze kugera mu bitaro by'uturere 28 mu gihugu, gitanga ubufasha mu buvuzi, ubujyanama bw'isananimitima, ubwunganizi mu mategeko ..ku bahohotewe mu buryo butandukanye. Muri iyi nama, abaturage bafite ibibazo by'ihohoterwa bitabiriye kugeza ibibazo byabo ku kigo Isange One Stop Center ngendanwa, kigizwe n'imodoka irimo ibyangombwa nkenerwa kuri serivisi gisanzwe gitanga.

CP Nyamwasa yari aherekewje n'umuyobozi w'akarere ka Gasabo wungirije ushinzwe imbereho y'abaturage, Languida Nyirabahire n'abandi bayobazi b'ibanze n'abapolisi ku nzego zose.

Mbere y'inama n'abaturage, CP Nyamwasa yabanje kugirana inama n'abayobazi b'ibanze aho yabibukije inshingano zabo mu kurwanya ibyaha kandi abagira inama yo gukomeza gushishikariza abaturage gutanga amakuru ku byaha.

Aganira n'abaturage, Visi Meya Nyirabahire yagaragaje ibishobora gutera ihohoterwa ryo mu ngo maze atanga ingeri nyinshi z'amakosa abera mu

ngo avamo ihohoterwa hagati y'abashakanye no ku bana.

Nyirabahire yagize ati:" Iyo ikibazo nk'iki kibaye mu baturanyi, ntugomba kubyirengagiza,...umenyeko iyo bikaze nawe bikugeraho. Ntstabaho utekanye mu gihe umuturanyi amerewe nabi. Leta yashyizeho ingamba zitandukanye zo kurwanya ihohoterwa ryo mu ngo n'irikorerwa abana, Polisi y'u Rwanda yakoze akazi gakomeye mu kurandura iki kibazo mu miryango yacu, niyo mpamvu ubufatanye na yo ari ngombwa kugirango bigerweho."

Yifuje ko ubukangurambaga nk'ubu bwakorwa kenshi kandi bukabera ahantu hatandukanye kugira ngo Abaturwanda barusheho gusobanukirwa ingaruka z'ihohoterwa rishingiye ku gitsina n'irikorerwa abana.

Superintendent of Police (SP) Shafiga Murebwayire yabwiye abo baturage serivisi za Isange One Stop Center, kandi abasobanurira ingaruka ihohoterwa rishingiye ku gitsina rigira ku warikorewe, uwarikoze, ku miryango yabo bombi, ku muryango Nyarwanda ndetse no ku gihugu muri rusange.

Yagize ati:"Ihohoterwa rishingiye ku gitsina rikorwa ahanini n'abanyoye ibiobyabwenge....Niba dushaka kurwanya burundu iki cyaha; tugomba guhera ku kigitera. Ababyeyi barasabwa kumenya ibyo abana babo babamo, ibibazo bahura na byo, abo bagendana, ndetse n'ibyo bakora kuko ari ho bazahera babarinda kwishora mu bitemewe n'amategeko.

Iki gikorwa cyari muri gahunda y'ubukangurambaga bwa Polisi y'u Rwanda bwo kurwanya ihohoterwa rishingiye ku gitsina n'irikorerwa abana, ikaba yunganirwa n'abafatanyabikorwa bayo batandukanye.

Abanyeshuri b'Abayisilamu biyemeje kuba abafatanyabikorwa mu kurwanya ibyaha



Abanyeshuri 115 b'Abanyarwanda b'Idini ya Isilamu biga muri Kaminuza n'Amashuri Makuru mu Rwanda no mu mahanga tariki 28 Nyakanga bagiranye inama y'umunsi umwe n'abofisiye bakuru ba Polisi y'u Rwanda ku Cyicaro Gikuru cyayo ku Kacyiru, iyo nama ikaba yari igamije gufatira hamwe ingamba zo kurwanya no gukumira ubwihebe b'ubutagondwa.

Mu ijambo rye, Umuyobozi Mukuru wa Polisi y'u Rwanda, Inspector General of Police (IGP) Emmanuel K. Gasana yasabye urwo rubyiruko kuzirikana buri gihe intumbero y'ubuyobozi bukuru bw'igihugu ari yo 'Ubumwe, Imitekerereze yagutse, no gukorera mu mucyo'.

Yababwiye ati:"Mukwiye kuba urubyiruko rufite intego kandi kugira ngo mubigereho murasabwa kugira imigambi ihamwe y'ibyo mushaka kugeraho kandi mugaharanira kugera ku ntego mwihaye. Mu gihe mushyira mu bikorwa ibyo mwiga mu ishuri mujye muzirikana kandi mushyire imbere inyungu z'igihugu. Nta cyiza nko kugira uruhare mu iterambere ry'igihugu cyawe."

IGP Gasana yakomeje agira

ati:"Ubufatanye ni bumwe mu buryo bwo kurwanya nogukumira ubwihebe n'ubutagondwa mu gihugu cyacu. Nihagira umenya amakuru y'ikintu gishobora kubiganishaho azihutire kuyamenyesha inzego zibishinzwe... kandi ni yo ntego y'ubu bufatanye."

Hashingiwe ku byifuzo by'abo banyeshuri ndetse na Mufti Sheikh Salim Habimana, IGP Gasana yasabye ko inama nk'iyi yaba kenshi kandi igahuza ibyiciro bitandukanye by'abayoboke ba Isilamu mu Rwanda. Mufti Habimana yasabye urwo rubyiruko kuba nyambere mu kwimakaza indangagaciro za kirazira z'umuco Nyarwanda.

Umunyeshuri uhagarariye bagenzi be b'Abayisilamu witwa Ishimwe Salim yavuze ko we na bagenzi be biyemeje kujya bahura kenshi na Polisi y'u Rwanda kugira ngo bungurane ibitekerezo ku kuntu barushaho kunoza ubufatanye mu gukumira ibyaha muri rusange.

Yongeyeho ko biyemeje kandi kuba intagarugero mu kwimakaza indangagaciro za kirazira z'umuco Nyarwanda, kandi ko bazifashisha imbuga nkoranyambaga mu

kumenyekanisha gahunda z'igihugu z'iterambere.

Ishimwe yagize na none ati:"Twiyemeje kandi kuba ku isonga mu kurwanya iterabwoba no gusobanura neza Quran."

Muriyo nama yari ifite insanganyamatsiko igira iti:"Ubufatanye mu gutegura ejo hazaza hacu hatekanye" abo banyeshuri baganirijwe ku ngingo zirimo 'Isilamu, Umuco n'Ubumwe mu buryo bwagutse, impamvu inzego z'umutekano zikwiriye kurwanya ubutagondwa muri ibi bihe, uburyo ubutagondwa n'ubwihebe bihungabanya umutekano n'uruhare ry'urubyiruko rw'Idini ya Isilamu mu kibirwanya.

Umuyobozi w'Ishami rya Polisi y'u Rwanda rishinzwe kurwanya ibyaha by'iterabwoba , Assistant Commissioner of Police (ACP) Denis Basabose yavuze ko iyo nama yari igamije kungurana ibitekerezo no gufatira hamwe ingamba zo kurwanya ibyaha no gukangurira abanyeshuri b'Idini ya Isilamu biga muri Kaminuza zo mu mahanga kutishora mu bikorwa by'iterabwoba n'ubwihebe.

Yavuze ko inama nk'izi ari ingirakamaro kuko zifatirwamo ingamba zo gukumira ibikorwa by'iterabwoba n'ubwihebe mu Rwanda.

Urubyiruko rw'abakorerabushake rwateguye umukino mu rwego rwo gukangurira urundi kwirinda ibiyobyabwenge

Mu rwego rwo guca burundu ikoreshwa ry'ibiyobyabwenge, abanyamuryango b'urubyiruko rw'abakorerabushake mu gukumira ibyaha mu karere ka Kirehe, ku itariki ya 28 Kanama bateguye irushanwa ry'umupira w'amaguru ryahuje utugari twose 6 tugize Umurenge wa Gahara.

Umurenge wa Gahara ni umwe mu mirenge ya Kirehe igaragaramo ikoreshwa ry'ibiyobyabwenge riri hejuru, ukaba ari n'umwe mu nzira zinyuzwamo ibiyobyabwenge.

Iri huriro ry'uru rubyiruko rikaba rigira uruhare rukomeye mu kurwanya no gukumira ibyaha ribinyujije ku bukangurambaga uru rubyiruko rukorera mu bigo by'amashuri, bafasha imiryango itishoboye nk'ime mu ngamba zabo mu kugira uruhare mu iterambere ry'abaturage.

Muri iri rushanwa, akagari ka Rubimba katsinze aka Nyakagezi, maze kegukana igikombe n'amafaranga agiherekeje. Aya mafaranga na yo akaba yarakusanyijwe

n'uru rubyiruko.

Numa y'iryo rushanwa, Umuhuzabikorwa w'urubyiruko rw'abakorerabushake mu gukumira ibyaha muri Kirehe, Ngarukiyinka Faustin yavuze ko iri rushanwa ryateguve ku rwego rw'akarere rikaba rizakomereza no mu yindi mirenge.

Yagize ati: "Turashaka ko ubutumwa bwacu bugera ku baturage b'akarere kose biciye mu mikino y'umupira w'amaguru nk'iyi; kuko ni umukino ukunzwe na benshi mu rubyiruko, kandi ahanini ni rwo rwhishora mu biyobyabwenge, tukaba dufatanyije na Polisi y'u Rwanda tuboneraho umwanya wo kubakangurira ububi bwabyo n' uruhare rwarwo mu kubirwanya."

Inspector of Police (IP) Gahigi Harerimana, ushinzwe guhuza ibikorwa bya Polisi n'abaturage mu karere ka Kirehe yasabye urwo rubyiruko kuba umusemburo w'impinduka nziza, bakarushaho kurwanya ikoreshwa n'icuruzwa ry'ibiyobyabwenge."

Yagize ati: "Dushyize hamwe twagera kuri byinshi, turusheho guhanahana amakuru y'abantu bose bagira uruhare mu byahungabanya umutekano, nk'abacuruza ibiyobyabwenge n'ababikoresha, mufite uruhare runini muri iki gikorwa."

Yashimye urwo rubyiruko rw'abakorerabushake kuba rwaratekereje gushyiraho iri rushanwa, asaba n'urundi rubyiruko kugera ikirenge mu cya bagenzi babo baba abanyamuryango b'ihi huriro no kugira uruhare mu iterambere ry'ighugu.



Kicukiro: Abatunganya imisatsi n'abogosha biyemeje ubufatanye mu kurwanya ibyaha

Buri muntu wogosha amarana n'uwo yogosha nibura iminota 30, muri icyo gihe cyose bashobora kuba baganira byinshi kandi babonye umwanya wo kugirana inama.

Ni muri urwo rwego, ku itariki ya 26 Kanama, ushinzwe imikoranire ya Polisi n'abaturage mu karere ka Kicukiro, Inspector of Police (IP), Hamdun Twizeyimana yagiranye inama n'abakora umwuga wo kogosha no gutunganya imisatsi bagera ku 146 bibumbiye mu ishyirahamwe ryitwa Union des Coiffeurs et Estheticiens de Kicukiro (U.C.E.K) , ishyirahamwe rikorera mu karere ka Kicukiro . Hari hagamijwe kubakangurira kwirinda

ikoreshwa ry'ibiyobyabwenge nk'icyaha cyiganje mu bakora uwo mwuga kurusha ibindi, abaganiriza kandi ku icuruzwa ry'abantu n'ihohoterwa rishingiye ku gitsina.

IP Twizeyimana yagize ati: "Gutanga amakuru kuri bagenzi banyu bakoresha ibiyobyabwenge ni byiza kuko bamenyekanye bakwigishwa bakagaruka mu murongo mwiza."

Yakomeje avuga ko inyobwa ry'ibiyobyabwenge rigira ingaruka ku buzima bw'ubinywa, ku mibereho ye no ku y'abandi bamuri hafi kandi bitera ikorwa ry'ibyaha byinshi birimo amakimbirane atandukanye, gukubita no gukomretsia

n'ubwicanyi.

Yasoje ikiganiro yagiranye na bo agira ati: "Abatunganya imisatsi n'abogosha na bo bagomba kumenya abakoresha ibiyobyabwenge kandi bakabimenesha Polisi ngo ibace intege. Ibi bizatuma kandi urubyiruko muri rusange rurindwa kwijandika mu biyobyabwenge."

Ndayizigije Gervais, umuyobozi w'ishyirahamwe U.C.E.K yashimiye Polisi ku mbaraga ikoresha mu gukumira no kurwanya kandi ashima ko n'abagize ishyirahamwe ayobora batekerejweho, maze asezeranya ko bagiye kongera ubufatanye na Polisi muri gahunda zayo zo kurwanya ibyaha.

Intara y'Iburasirazuba: Abaturage basabwe gufatanya kurwanya ubujura bw'amatungo

Abatuye mu Ntara y'Iburasirazuba basabwe kurangwa n'ubufatanye mu kurwanya ubujura bw'amatungo, ikoreshwa n'itundwa ry'ibiyobyabwenge n'ibindi byaha.

Ubu butumwa bwatanzwe ku itariki 24 Kanama n'Umuyobozi w'iyi Ntara, Odette Uwamariya mu nama yagiranye n'abaturage bagera ku 1500 bo mu mirenge ya Kageyo, Gitoki na Gatsibo yo mu karere ka Gatsibo.

Iyo nama yabereye mu kagari ka Busetsa, ho mu murenge wa Kageyo. Yitabiriwe n'abayobozi b'Inzego z'umutekano barimo Umuyobozi wa Polisi y'u Rwanda muri iyi Ntara, Assistant Commissioner of Police (ACP) Emmanuel Karasi.

Mu butumwa bwe, Uwamariya yagize ati:"Ibyo mumaze kugeraho mubikesha umutekano usesuye uri mu gihugu cyacu. Uruhare rwa buri wese rurakenewe kugirango turwanye ubujura bw'uburyo bwose n'ibiyobyabwenge."

Yakomeje agira ati:"Inzego z'umutekano ntizabera hose icya rimwe. Ibi bihita biha buri wese inshingano zo kugira uruhare mu kubumbatira umutekano yirinda ibyaha kandi atanga amakuru yatuma bikumirwa."

Uwamariya yasabye kandi abatuye muri iyi Ntara gukora neza amarondo kugira ngo barusheho kurwanya ikoreshwa n'itundwa ry'ibiyobyabwenge n'ubujura burimo ubw'amatungo, ubw'imyaka n'ubwo mu mazi.

Yabwiye abo baturage ati:"Abanywa ibiyobyabwenge, ababitunda, ndetse n'abacicuruza murabazi kubera ko mu babikora harimo abavandimwe banyu, inshuti zanyu, cyangwa abaturanyi banyu. Ntimukahishire kubera ko ingaruka z'ibyo bakora zibageraho ku



buryo bumwe cyangwa ubundi."

Mu ijambu rye, ACP Karasi yagize ati:"Nta cyiza cy'ibiyobyabwenge. Nk'uko byitwa bitesha ubwenge uwabinyoye maze agakora ibikorwa binyuraniye n'amategeko nko gukubita no gukomeretsa, gufata ku ngufu, ihohoterwa rishingiye ku gitsina, no gusambanya abana. Abantu bakwiye kutabinywa, kutabiceruza no kutabitunda kandi bakagira uruhare mu kubirwanya batanga amakuru y'babikora."

Yabwiye abari aho ko ibiyobyabwenge bikunze gufatirwa mu Ntara y'Iburasirazuba harimo Kanyanga, urumogi, n'inzoga zitemewe mu Rwanda nka Chief Waragi, Blue Sky, kandi yongeraho ko bivanwa mubihugu bihanna imbibi n'iyi Ntara.

ACP Karasi yagize ati:"Amayeri y'abacicuruza n'ababitunda ndetse n'inzira bobicishamo babyinjiza mu gihugu turazizi. Turagira abantu inama yo kubireka batarahura n'ingaruka zo

kubyishoramo zirimo igifungo, gucibwa ihazabu n'igihombo."

Yagize kandi ati:"Gukora amarondo neza no gutangira amakuru ku gihe biri mu bizatuma ubujura bw'uburyo bwose bukumirwa kandi ababukoze batatwe vuba."

Abitabiriye iyo nama beretswe abantu 20 bafungiwe kwiba amatungo, imyaka, n'ibintu bitandukanye mu masoko no mu mazu. Abo bantu babwiye abari aho ibyo bibye n'uko babigenje kandi babakangurira kubyirinda.

ACP Karasi yasoje ubutumwa bwe asaba abatuye muri iyi Ntara kuba ijisho ry'umuturanyi; birinda ikuntu cyose kinyuraniye n'amategeko kandi batanga amakuru ku gihe yatuma gikumirwa.

Ubu bukangurambaga buje bukurikira ubwabereye mu murenge wa Mushenyi ho mu karere ka Nyagatare ku itariki 18 Kanama aho ibihumbi by'abaturage basabwe kurangwa n'ubufatanye mu kurwanya ubujura bw'amatungo n'ibindi byaha.

Ubu butumwa babugejejeweho n'abayobozi barimo Minisitiri w'Ubutegetsi bw'Ighugu, Francis Kaboneka, Umuyobozi Mukuru wa Polisi y'u Rwanda, Inspector General of Police (IGP) Emmanuel K. Gasana n' Umuyobozi w'Inkeragutabara ku rwego rw'igihugu, Lt. Gen. Fred Ibingira.

Amayeri y'abacicuruza n'ababitunda ndetse n'inzira bobicishamo babyinjiza mu gihugu turazizi. Turagira abantu inama yo kubireka batarahura n'ingaruka zo kubyishoramo zirimo igifungo, gucibwa ihazabu n'igihombo."

Musanze: Urubyiruko 117 rwabaye abakorerabushake mu gukumira ibyaha

Nyuma y'inama yahuje urubyiruko rwo mu murenge wa Busogo, mu karere ka Musanze ku itariki ya 4 Kanama, muri rwo 117 rwahise rufata icyemezo cyo kuba abanyamuryango b'Ithuriro ry'urubyiruko Nyarwanda rw'abakorerabushake mu kurwanya no gukumira ibyaha muri uyu murenge (Rwandan Youth Volunteers In Community Policing-RYVCPO).

"Ibyaha bitandukanye bigaragara muri aka karere akenshi bikorwa n'abanyoye ibiyobyabwenge, mwe maboko y'igihugu murasabwa kubyirinda."

Rwafashe iki cyemezo nyuma y'ikiganiro ku ruhare rw'urubyiruko mu kurwanya no gukumira ibyaha rwahawe n'ushinzwe imikoranire ya Polisi y'u Rwanda n'abaturage ndetse n'izindi nzego muri Musanze, Inspector of Police (IP) Viateur Ntiyamira, n'Umuhuzabikorwa w'iri Huriro muri aka karere, Murangamirwa Theodore.

IP Ntiyamira yabwiye urwo rubyiruko ati:"Ibyaha bitandukanye bigaragara muri aka karere akenshi bikorwa n'abanyoye ibiyobyabwenge, mwe maboko y'igihugu murasabwa kubyirinda."

Yakomeje ababwira ati:"Urubyiruko muhura n'ibishuko byinshi cyane cyane abakobwa. Mwirinde ababizeza ibitangaza ko bazabashakira imirimo myiza kuko hari ababa bashaka kubashora mu icuruzwa ry'abantu cyangwa mu busambani."

Murangamirwa yashimye abo banyamuryango bashya, maze abasaba kuba intangarugero, aha akaba yarababwiye ko kugira ngo ibyo babigereho bagomba kwirinda ikibi aho kiva kikagera, kandi bagakangurira n'abandi kukirinda.

Yagize ati:"Mu by'ukiri, urubyiruko ni twe dukviye gufata iya mbere mu kwicungira umutekano, tugatanga umusanzu mu kurwanya no gukumira ikintu cyose gishobora kuwuhungabanya, tukarushaho gukorera no gukunda igihugu no kurinda ibyagezweho."

Aba banyamuryango 117 bashya baje biyongera ku bari basanzwe bagize iri huriro muri uyu murenge bagera kuri 12.

Bane bafungiwe kugerageza guha ruswa abashinzwe umutekano

Abagabo bane bafunze bazira kugerageza guha ruswa abashinzwe umutekano nyuma yo gufatirwa mu bikorwa binyuranije n'amategeko.

Ababikurikiranyweho ni Abdullah Mohamed, Biyondo George William na Rukundo Thierry, bose bakaba ari abashoferi. Bafashwe mu ijoro ryo ku wa 6 Kanama ku muhanda wa Gicumbi-Gatuna.

Polisi y'u Rwanda mu karere ka Gicumbi ivuga ko batanze amafaranga y'u Rwanda ari hagati y'1000 na 2000 mu igenzura ry'ibyangombwa by'imodoka bari batwaye buri wese, ryaberaga mu murenge wa Cyumba.

Na none mu karere ka Kicukiro uwitwa Bugingo Jean Paul yafashwe agerageza guha ruswa y'amafaranga y'u Rwanda 200,000 umukozi w'urwego rwa DASSO mu murenge wa Kigarama, mu kagari ka Nyarurama.

Kuri iki gikorwa, Umuvugizi wa Polisi y'u Rwanda mu Mujyi wa Kigali, Superintendent Emmanuel Hitayezu yavuze ko Bugingo yafashwe mu gihe hakorwaga umukwabu wo kureba abafite inyubako nshya niba bafite ibyangombwa bibemerera kubaka.

SP Hitayezu yagize ati:"Umwé mu bagize uru rwego wari uri mu kazi yamusanganye ibyangombwa avuga ko yakuye ku karere ka Kicukiro ariko agenzuye asanga ari ibihimbano, ni bwo yahise ashaka gutanga 200,000 ya ruswa ngo bamureke yikomereze, ahita afatwa."

Yavuze ko iyi mikorere ku bashinzwe umutekano ari iya kinyamwuga, maze akangurira abaturage muri rusange kwirinda gutanga no kwakira ruswa, anabasaba kujya batanga amakuru ku gihe ku kintu cyose kiganisha kuri ruswa n'ibindi binyuranyije n'amategeko.

"Umwé mu bagize uru rwego wari uri mu kazi yamusanganye ibyangombwa avuga ko yakuye ku karere ka Kicukiro ariko agenzuye asanga ari ibihimbano, ni bwo yahise ashaka gutanga 200,000 ya ruswa ngo bamureke yikomereze, ahita afatwa."

Nyanza: Gutangira amakuru ku gihe byatumye hafatwa moto yari yibwe

Abagabo babiri bafatiwe mu karere ka Nyanza bafite moto bacyekwa kwiba mu Mujyi wa Kigali.

Iyo moto ya Mbarushimana Jules Bosco yibiwe ku Kinamba, mu karere ka Gasabo mu ijoro ryo ku itariki 2 Kanama.

Umuyobozi wa Polisi y'u Rwanda mu Ntara y'Amajyepfo, Assistant Commissioner of Police (ACP) Dismas Rutaganira yavuze ko abacyekwa kuyiba ari Ndayambaje Aimable na Kagabo Antoine. Bafatiwe mu murenge wa Busasamana, ho mu karere ka Nyanza ku itariki 3 Kanama.

Yagize ati:"Ku itariki 2 Kanama, amakuru yatugezeho aturutse mu karere ka Gasabo ko hari moto ifite nomero ziyiranga RD 175 N yibwe maze ikazanwa mu Ntara y'Amajyepfo. Twahise dufatanya n'amashyirahamwe y'abamotari kugeza tuyifatanye bariya bombi."

Gatsibo: Abayobozi b'imisigiti y'abayisilamu barasabwa ubufatanye mu gukumira ibyaha



Abayobozi 195 b'imisigiti y'Abayisilamu mu murenge wa Kiramuruzi, ho mu karere ka Gatsibo basabwe kugira uruhare mu kurwanya no gukumira ibyaha.

Babisabwe ku itariki 7 Kanama mu

nama bagiranye n'umuyobozi w'aka karere, Richard Gasana n'umuyobozi wa Polisi y'u Rwanda kuri uru rwego, Superintendent of Police (SP) Eric Kabera.

Gasana yashimye ubufatanye buri

hagati y'akarere ndetse n'abayisilamu mu bikorwa bitandukanye bigamije iterambere, kubungabunga umutekano ndetse n'isuku.

Yasabye abo bakuriye imisigiti gukomeza kwitabira gahunda za leta zinyuranye, kumenya no kugira uruhare muri gahunda y'imihigo y'aka karere.

SP Kabera yabasabye kuba ijisho ry'umuturanyi no kugira uruhare mu gukumira ibyaha batanga amakuru ku gihe yatuma hakumirwa ikintu cyose cyahungabanya umutekano.

Umu yobozi w'abayisilamu mu Ntara y'Iburasirazuba, Sheikh Djumaine Kamanzi, yavuze ko imibanire y'abagize idini ya Isilamu n'ubuyobozi bw'ibanzo muri aka karere ndetse n'abandi baturage muri rusange yifashe neza.

Yagize ati: "Twatanze amafaranga y'u Rwanda miliyoni 6 nk'inkunga yo gufasha abatishoboye y'ubwisungane mu kwivuza. Buri muyobozi w'umusigiti yasabwe kandi kugira uruhare mu bikorwa byose by'imihigo y'akarere bigamije iterambere ry'abaturage."

Amadini agira uruhare mu kurwanya ibyaha - Polisi y'u Rwanda

Polisi y'u Rwanda irashima amadini ku ruhare rwayo mu kurwanya ibyaha bigisha abayoboke bayo kuba indacyemwa n'intangarugero.

Mu rwego rwo guteza imbere ubwo bufatanye no kubushimangira, Polisi y'u Rwanda igirana ibiganiro n'abayoboke b'amadini atandukanye cyane cyane urubyiruko, maze ikabaha ubumenyi ku buryo barushaho kugira uruhare mu gukumira ibyaha.

Guhugura abayoboke b'amadini atandukanye bigamije kubasobanurira uruhare rwabo mu kurwanya ikibi mu muryango nyarwanda; kandi byabyaye umusaruro ushimishije.

Ni muri urwo rwego ku itariki 29 Nyakanga, Polisi y'u Rwanda yagiranye ikiganiro ku bubi bw'ibiyobyawenye n'urubyiruko rw'Abadivantisite b'Umunsi wa Karindwi rugera kuri 438 rwari mu

ngando mu karere ka Nyanza.

Urwo rubyiruko rwaturutse mu turere twa Nyanza, Kamonyi, Muhanga na Ruhango.

Polisi y'u Rwanda yarwigishije ubwoko bw'ibiyobyawenye kandi irusobanurira ingaruka zo kubyishoramo.

Mu butumwa bwe, ushinzwe imikoranire ya Polisi y'u Rwanda n'abaturage ndetse n'izindi nzego mu karere ka Nyanza, Inspector of Police (IP) Jean Baptiste Bizimana yabwiye urwo rubyiruko ati: "Zimwe mu ngaruka urubyiruko runywa ibiyobyawenye ruhura na zo harimo gutwara inda zitateganyijwe no gukora ibyaha birimo ubujura, gukubita no gukomeretsa, n'ibindi. Ni yo mpamvu ikoreshwa n'ikwirakwizwa ryabyo bigomba kurwanya kandi buri wese akumva ko bimureba."

Yakomeje ababwira ko uretse gushyira ubuzima bw'ababinywa mu

kaga ibiyobyawenye biteje ikibazo muri rusange kubera ko bituma abantu bakora ibikorwa binyuranije n'amategeko.

IP Bizimana yabwiye kandi urwo rubyiruko ati: "Nk'uko bivugitse ibiyobyawenye bihindura imitekerereze y'uwabinyoye. Uretse kumutesha ubwenge; ubinywa nta buzima aba afite. Mugomba kwirinda ikintu cyose gishobora kwangiza ahazaza hanyu."

Yarusobanuriye ko urumogi, Kanyanga n'ibindi biyobyawenye bitera uwabinyoye gukora ibyaha nko gufata ku ngufu, gusambanya abana, n'ibindi.

Yagize ati: "Akora ibyaha kubera ko nta mutimanama aba afite. Turabasaba kuba abafatanyabikorwa mu gukangurira abandi kwirinda ibiyobyawenye n'ibindi byaha muri rusange."



Umuganda udasanzwe wakozwe mu rwego rw'ubukangurambaga ku isuku n'umutekano

Mu rwego rw'ubukangurambaga ku isuku n'umutekano, ku itariki 13 Kanama Polisi y'u Rwanda yifatanyije n'Umujyi wa Kigali mu gikorwa cy'Umuganda udasanzwe.

Uwo muganda wabereye mu murenge wa Rusororo, ho mu karere ka Gasabo aho ibihumbi by'abaturage ba Kabuga ya mbere, abakozi b'Umujyi wa Kigali, Abapolisi n'Ingabo batemye ibihuru mu mudugudu w'Amahoro muri gahunda yo kubikuraho kubera ko bishobora kuba indiri y'imbu n'abanywi b'ibiyobyawenye.

Icyo gikorwa cyitabiriwe kandi n'Umuyobozi w'Umujyi wa Kigali, Monique Mukaruriza, Umuyobozi Mukuru wa Polisi y'u Rwanda, Inspector General of Police (IGP) Emmanuel K. Gasana na Maj .Gen.

Moubarak Muganga n'abandi bayobozi.

Aganira n'abaturage nyuma y'umuganda, Mukaruriza yabasabye kurangwa n'imvugo igira iti:"Tugire umutekano, dukumira icyaha kitaraba, buri wese abe ijisho rya mugenzi we, dutangira amakuru ku gihe, kandi vuba."

Yashimye uruhare rw"Ingabo na Polisi mu bikorwa biteza imbere imibereho y'abaturage, maze asaba abaturage kwigira kuri izi nzego besa imihigo mu kugira uruhare mu kubumbatira umutekano no kwimakaza umuco wo kugira isuku.

Ubu bukangurambaga bw'isuku n'umutekano bumara amezi 6 bufite intego yo gukomeza kugira Kigali umujyi usukuye kandi utekanye.

Muri ubu bukangurambaga, mu rwego rw'umutekano; impande zombi zizafanya mu kurwanya ibiyobyawenye, kurwanya guha abana batarageza ku myaka y'ubukure ibisindisha, ihohoterwa rishingiye ku gitsina, kandi buzibanda ku ikorwa neza ry'amarondo. Hazibandwa kandi ku kwirinda no kurwanya impanuka zo mu muhanda, kurwanya inkongi zimiriro, kubahiriza amabwiriza ajyanye no kurwanya urusaku, imikorere myiza ya komite z'abaturage zo kwicungira umutekano, gukumira ibyaha no gutangira amakuru ku gihe (CPC's).

Mukaruriza yagize kandi ati:"Kugera ku byo twifusa muri ubu bukangurambaga bizaterwa n'uruhare rwa buri wese, imihigo yashiyizweho umukono n'ubuyobozi bwanyu mu izina ryanyu, ntimugate imyanda aho mubonye, mugire umuco w'isuku no kwita ku mutekano."

Mu ijambo rye, IGP Gasana yagize ati:"Nyakubawa Perezida Paul Kagame yaduhaye umurongo w'icyerekezo cyiza. Ntidushobora kugera aho dushaka kugera iyihe turangwa n'isuku nke."

Yakomeje agira ati:"Ikoreshwa ry'ibiyobyawenye n'ibisindisha, ubujura, gukubita no gukomeretsa, ihohoterwa rishingiye ku gitsina n'ibindi binyuraniye n'amategeko ntibibereye umunyarwanda. Ntawe ugomba gusigara inyuma mu muvuduko w'iterambere kandi iyo nta mutekano, n'ibindi byose bigenda nabi."

Umuyobozi Mukuru wa Polisi y'u Rwanda yasoje asaba abaturage kurangwa n'ubufatanye mu gutahura, gukumira no kurwanya ibyaha binyuze mu guhanahana amakuru ku gihe.



Ikigo gicukura amabuye y'agaciro cyahagaritswe kubera imikorere mibi



Ubugenzuzi buherutse gukorerwa mu Karere ka Rutsiro bwatumye ikigo gicukura amabuye y'agaciro cya Twabugezi gihagarika imirimo yacyo kubera kubangamira ibidukikije, kwangiza imigezi ndetse no kuba kidafite ibikoresho bihagije mu gucukura aya mabuye.

Iri hagarikwa ryabaye taliki ya 22 Nzeli rikozwe n'itsinda ryihariye rya Gishwati-Mukura rigizwe n'ishami rya polisi y'igihugu rishinzwe kurengera ibidukikije(EPU), ikigo cy'igihugu cy'umutungo kamere(RNRA), ikigo cy'igihugu gishinzwe kurengera ibidukikije(REMA), ikigo cy'igihugu gishinzwe ubucukuzi bw'amabuye y'agaciro(RMA), ndetse n'ikigo cy'igihugu gishinzwe iterambere(RDB), ibi byashinzwe kugenzura ubucukuzi bw'amabuye y'agaciro ndetse no guhangana n'ingaruka mbi ziterwa n'ubucukuzi butemewe bw'amabuye y'agaciro.

Iri genzura ryabaye mu misi itatu rikorwa mu bigo umunani bicukura amabuye y'agaciro mu Karere ka Rutsiro.

Avuga kubirebana n'iri genzura, umuyobozi

w'ishami rya polisi rishinzwe kurengera ibidukikije Superintendent Modeste Mbabazi yatangaje ko hari impamvu nyinshi zatumye bahagarika ikigo cya Twabugezi.

SP Mbabazi yagize ati "twasanze ko ubucukuzi bw'amabuye ya gaciro muri iki kigo bwangiza umugezi ndetse n'impombo ziyungurura aya mabuye ntabwo zifite ubuziranenge, izi nizo mpamvu ahanini zatumye hafatwa iki cyemezo cyo guhagarika iki kigo cya Twabugezi"

Yongeyeho ko kandi iki kigo cyigomba gukora iyo bwabaga mu kurengera uyu mugezi ndetse n'ubucukuzi bw'amabuye y'agaciro nabwo bukorwe mu buryo butunganye butabangamira uyu mugezi.

Iki kigo cyahagaritswe cyari mu maboko y'ikigo cy'Abanyamerika gicukura amabuye y'agaciro NRD Limited ubu cyahagaritse imirimo yacyo mu Rwanda.

Raporoyakozwe n'iri tsinda igaragaza ko imigezi yose yari ikikije icyahoze ari NRD Limited yabangamiwe cyane n'ubucukuzi bw'amabuye y'agaciro ahanini kubera abantu batazwi bakora ubu bucukuzi.

**"Twasanze
ko ubucukuzi
bw'amabuye ya
gaciro muri iki
kigo bwangiza
umugezi ndetse
n'impombo
ziyungurura
aya mabuye
ntabwo zifite
ubuziranenge,
izi nizo mpamvu
ahanini zatumye
hafatwa iki
cyemezo cyo
guhagarika
iki kigo cya
Twabugezi"**

Polisi y'u Rwanda yaburijemo icuruzwa ry'abantu batatu, inafata ucyekwaho gukora iki cyaha

Polisi y'u Rwanda yaburijemo igikorwa cy'icuruzwa ry'abagore batatu bafite ubwenegihugu bw'u Burundi bakaba bari bajyanywe muri Saudi Arabia bacishijwe mu Rwanda.

Imyirondoro y'abo babyeyi uko ari batatu yamenyekanye ubwo ku itariki 16 Nyakanga bendaga kwinjizwa mu Rwanda banyujijwe ku mupaka w'Akanyaru.

Na none kuri uwo munsi Polisi y'u Rwanda yafatiye kuri uyu mupaka umugabo ufite ubwenegihugu bwa Kenya witwa Asman Macharia Wakira.

Uwo mugabo yavuze ko atazi abo bagore mu gihe bo bamushinja ko ari we wari inyuma y'iki gikorwa cyo kujya kubacuruza.

Umwe muri bo utarashatse ko imyirondoro ye igaragazwa, yavuze ko hari Umurundikazi mugenzi wabo baturanye mu muysi wa Bujumbura wabagejejeho umugambi wo kubajyana muri Saudi Arabia aho yababwiraga ko bazajya binjiza ku kwezi hafi ibihumbi 500 by'amarundi ariko ko buri wese yabimubwiye ku giti cye. N'ubwo bari baturanye, abo batatu nta wigeze amenya ko mugenzi we yabwiwe n'uwo muturanyi wabo ko ashaka kumuujyana muri iki gihugu.

Uwo mugore yagize ati:"Ku munsi ubanziriza uwo twagombaga kujyanwaho, twatunguwe no kumva buri wese asezera kuri mugenzi we amubwira ko agiye muri Saudi Arabia ndetse tuza kwisanga mu modoka imwe ituvanye i Bujumbura tujya i Kigali."

Asman Macharia Wakira avugana n'Itangazamakuru.

Yakomeje agira ati:"Uwo muturanyi wacu watugejejeho uwo mugambi yatubwiye ko nitugera ku mupaka turi bwakirwe n'undi muntu uvuye mu Rwanda, akaba ari we uzadufasha kugera i Nairobi tunyuze i Kampala ari na ho tuzahererwa viza."

Aba bagore batatu ntibari bazi ko umuntu babwiraga ko azabakira ku mupaka ndetse akanabafasha ari Wakira, bakaba ndetse baravanye na we i Bujumbura. Undi muri abo bagore batatu yagize ati:"Ntitwari tuzi utwakira ndetse ntitwanamenye ko twazanye na we mu modoka.Tugeze ku mupaka, ntitwari tuzi aho tugiye muri Kigali; ariko tukibiyaza; Wakira atangira kutwongorera atubwira ibyo tubwira Polisi harimo abo tugiye gusura mu Rwanda ndetse n'ahantu batuye."

Uwo mugore yakomeje avuga ko ucyekwaho gukora iki cyaha (Wakira) yanabaguriye ibyo kurya ndetse n'ibyo kunywa aho ku mupaka mbere yo gufatwa na Polisi, bakaba nyuma y'aho ari bwo bafashe umwanzuro wo kubwiza ukuri abashinzwe ubugenzacyaha bakorera aho ku mupaka."

Umuvugizi Mukuru wa Polisi y'u Rwanda, Assistant Commissioner of Police (ACP) Celestin Twahirwa yavuze ko Wakira yafashwe nyuma y'iperereza ku cyaha akurikiranyweho. Yagize ati:"Abapolisi bakurikiraniye

hafi ibikorwa bye maze bamaze kubona ibimenyetso bigaragaza uruhare rwe muri iki cyaha baramufata hanyuma avuga n'uko yari yateganyije kubikora."

ACP Twahirwa yagize kandi ati:"U Rwanda rwafashe ingamba zo kurwanya icuruzwa ry'abantu kandi ntirushobora gushakirwamo cyangwa ngo runyuzwemo abajyanwa gucuruzwa. Kurwanya iki cyaha biri mu byo Polisi y'u Rwanda yimirije imbere ariko na none umuntu wese akwiye kumva ko kukirwanya bimureba binyuze mu guhanahana amakuru ku gihe."

Yakomeje agira ati:" Dufite imikoranire myiza na Polisi yo mu gihugu cy'u Burundi ndetse n'iya Kenya binyuze mu masezerano atandukanye y'ubufatanye kandi tuzakomeza gufatanya kurwanya ibyaha ndengamipaka harimo n'iki cy'icuruzwa ry'abantu."

Umuntu uhamwe n'icyaha cy'icuruzwa ry'abantu ahanishwa igifungo kiri hagati y'imyaka irindwi kugeza ku myaka icumi n'ihazabu igera kuri miliyoni 10 z'amafaranga y'u Rwanda nk'uko biteganywa n'ingingo za 250 na 253 zo mu gitabo cy'amategeko ahana ibyaha mu Rwanda.

Iyo iki cyaha gikozwe ku rwego mpuzamahanga, uwo gihame ahanishwa igifungo kuva ku myaka icumi (10) kugeza ku myaka cumi n'itanu (15) n'ihazabu y'amafaranga y'u Rwanda kuva kuri miliyoni icumi (10.000.000) kugeza kuri miliyoni makumyabiri (20.000.000).

"Uwo muturanyi wacu watugejejeho uwo mugambi yatubwiye ko nitugera ku mupaka turi bwakirwe n'undi muntu uvuye mu Rwanda, akaba ari we uzadufasha kugera i Nairobi tunyuze i Kampala ari na ho tuzahererwa viza."

Intumwa zo muri Benin, Nigeria na Zimbabwe zasuye Isange One Stop Centre

Intumwa enye z'abagore zo muri Benin, Nigeria na Zimbabwe ku itariki 4 Kanama zasuye ishami rya Isange Stop Centre rya Kacyiru kugira ngo zirebe uko U Rwanda rukemura ibibazo by'ihohoterwa rishingiye ku gitsina n'iryakorewe abana ndetse n'uko rwita ku barikorewe.

Bahageze bakiriwe n'Umuuzabikorwa wa Isange, Superintendent of Police (SP) Shafiga Murebwayire wabasobanuriye amavu n'amavuko y'iki Kigo na serivisi abakigana bahabwa.

Zatambagijwe ibyumba bya Isange ya Kacyiru ndetse zisobanurirwa serivisi zibitangirwamo. Zeretswe icyumba abana bakirirwamo, icyakirirwamo abantu bakuru, ahakorera abagenzacyaha, aha akaba ari ho uwakorewe ihohoterwa atangira ubuhamya by'ibyamubayeho, amakuru atanze akaba ari yo ashingirwaho mu kumufasha no guha ubutabera ucyekwa gukora icyo cyaha ndetse

n'uwigikorewe.

SP Shafiga yazibwiye ati:"Twakira abagore n'abagabo bakorewe ihohoterwa rishingiye ku gitsina ndetse n'abana bahohotewe. Muri serivisi tubaha harimo kubapima, kubavura, no kubagira inama zitandukanye hashingiwe ku bwoko bw'ihohoterwa bakorewe, kandi ibyo byose tubibakorera ku buntu. Ubu ni bumwe mu buryo igihugu gikoresha mu kurwanya ihohoterwa rishingiye ku gitsina n'irikorerwa abana no kwita ku barikorewe." Yakomeje agira ati: "Dufite abajyanama mu by'ihungabana n'impuguke mu byiciro bitandukanye bita ku batugana. Serivisi zacu ntizirangirira hano mu Kigo; ahubwo abatugana turabasura kugira ngo turebe uko bamerewe."

Mu ijambo rye, Nhepera Neddi waturutse muri Zimbabwe yagine ati:"Ibi birashimishije kandi bisubiza icyizere abakorewe ihohoterwa.

**"Twakira abagore
n'abagabo bakorewe
ihohoterwa rishingiye
ku gitsina ndetse
n'abana bahohotewe.**

**Muri serivisi tubaha
harimo kubapima,
kubavura, no kubagira
inama zitandukanye
hashingiwe ku bwoko
bw'ihohoterwa
bakorewe, kandi ibyo
byose tubibakorera
ku buntu.Ubu ni
bumwe mu buryo
igihugu gikoresha mu
kurwanya ihohoterwa
rishingiye ku gitsina
n'irikorerwa abana no
kwita ku barikorewe."**

Tubigiyeho ibintu byinshi bizatuma tunoza ibikorwa byacu byo kwita ku bakorewe bene iri hohoterwa."

Mugenzi we wo muri Benin witwa Olga Tchiakpe yatatse Isange agira ati:"Iki ni igitekerezo cy'umwihariko kandi Abanyarwanda mukwiye guterwa ihema n'iyi gahunda yanyu y'indashyikirwa."

Kugeza ubu Isange ifite amashami mu bitaro by'uturere 27. Iki Kigo cyashyizweho mu 2009 ku bufasha bwa Madame wa Perezida wa Repubulika, Jeanette Kagame, binyuze mu Imbuto Foundation.

Isange ikurikiranwa na Polisi y'u Rwanda ifatanyije na Minisiteri y'ubuzima, iy'Ubutabera, na Minisiteri y'Uburinganire n'iterambere ry'umuryango.



Polisi yerekanye abakinnyi bashya n'ibikombe yatwaye mu mikino y'intoki (Handball)



IGP Gasana ashikiriza imyambaro abakinnyi bashya b'ikipe ya Police FC.

Umuyobozi Mukuru wa Polisi y'u Rwanda, IGP Emmanuel K. Gasana yakiriye ikipe ya Police FC n'iy'uw'intoki (Police Handball Club), uwo muhango ukaba wari ugamiye kwerekana abakinnyi bashya bazafasha

ikipe ya Police FC umwaka utaha wa shampiyona no kwerekana ibikombe ikipe ya Police Handball Club yegukanye. Abakinnyi bashya ba Police FC ni Hussein Habimana, Danny Nduwayo, Milafa Nizeyimana, Celestin Ndayishimiye, Amini Mwizerwa, Jean Bosco Akayezu, Antoine

Dominique Ndayishimiye, Christophe Biramahire na Olivier Usabimana.

Na none herekanye abatoza bashya bazafasha iyi kipe harimo Umutoza Mukuru, Innocent Seninga, umwungirije Justin Bisengimana na Claude Maniraho ushinzwe gutoza abanyezamu.

Mu ijambo rye, IGP Gasana yavuze ko inzira ya mbere isaba intsinsi ari ubushake no gufatanya mu gihe ufite icyo ushaka kugeraho.

Yagize ati: "Mwibuke ko abanyarwanda icyo duharanira ari intsinsi kandi mugomba kutadutenguha. Dukeneye ikipe itsinda kandi iyo ni yo nteto yacu ya mbere iduhesha ishema nka Polisi."

Umuyobozi wa Police FC, Colonel (rtd) Louis Twahirwa Dodo yijje ikipe ya Police FC inkunga nkuko bisanzwe bikorwa agira ati: "Abakinnyi bashya ndetse n'abatoza ni amaraso mashya n'imbaraga ziyongeye ku zindi."

Colonel (rtd) Twahirwa Dodo yasabye abakinnyi kwitwara neza no gukoresha neza ubufasha bw'uburyo bwose bahabwa.

Police Handball Club yashimiye ibikombe 6 yatwaye uyu mwaka harimo igikombe cya Shampiyona, icy'amarushanwa yo mu karere ka Afurika y'Iburasirazuba, igikombe cy'intwari, n'icyo kwibuka abakinnyi, abafana n'abakunzi b'uyu mukino bazize Jenoside yakorewe Abatutsi mu 1994.

Police Handball Club imaze imyaka ine yikurikiranyije itwara igikombe cya Shampiyona.



Police FC yasinyishije Mico wakiniraga AS Kigali



Mu rwego rwo kongera imbaraga mu gutaha izamu, Police Football Club yasinyishije Justin Mico wakiniraga AS Kigali, ibi bikaba bibaye mbere y'uko Shampiyona itangira.

Mico uftite imyaka 21 y'amavuko yatangiriye ruhago mu Ikipe y'Isonga. Abaye umukinnyi wa munani Police FC iguze muri iyi Shampiyona. Ku wa gatandatu tariki 20 Kanama ni bwo yasinye kuyikinira imyaka ibiri.

Aje asanga mugenzi we waguzwe mu minsi ishize bakinanye muri AS Kigali witwa Amini Mwizerwa.

Abandi bameruka kugurwa harimo Hussein Habimana, abanyezamu babiri baturutse muri Etincelles ari bo; Danny Nduwayo na Milafa Nizeyimana, Celestin Ndayishimiye wavuye muri Mukura Victory, Jean Bosco Akayezu wakiniraga Muhanga FC na Dominique Ndayishimiye waturutse muri Gicumbi FC.

Ku rundi ruhande, Christophe Biramahire na Olivier Usabimana batijwe Marine FC nyuma yo kuzamurwa dore ko bakiniraga Interfoce.

Umuvugizi wa Police FC, Chief Inspector of Police (CIP) Jean de Dieu Mayira yavuze ko Mico yaje kuziba icyaho cya Idesbard Nshuti wasezeye.

Yagize ati: "Amasezerano Nshuti yasinyanye na Police FC yabaga atararangira; ariko tumaze gusuzuma ubusabe bwe bwo gusezera kubera impamvu zishingiye ku bibazo bye bwite twarabimwemereye."

CIP Mayira yakomeje agira ati: "Dushingiye ku buhangi bwa Mico, turahamya tudashidikanya ko azaziba icyaho cya Nshuti. Turi kuziba ibyuho byose kugira ngo turusheho kubaka Ikipe."

***"Amasezerano
Nshuti
yasinyanye na
Police FC yabaga
atararangira; ariko
tumaze gusuzuma
ubusabe bwe bwo
gusezera kubera
impamvu zishingiye
ku bibazo bye bwite
twarabimwemereye."***

POLISI Y'U
RWANDA
IRAKANGURIRA
ABANTU

KWIRINDA
IBYAHHA

GUTANGIRA
AMAKURU
KUGIHE

KANDI VUBA



TURN BACK CRIME



ubukangurambaga
“TUBURIZEMO IBYAHÀ”



POLISI SPORT



**Polisi yerekanye abakinnyi
bashya n'ibikombe yatwaye
mu mikino y'intoki (Handball)**

